

京口三山志

北固山

北固山志卷十

丹徒周伯義編

宜興陳任暘訂

藝文三

國朝

再登北固山亭矚眺

冷士嵎

絕頂孤亭險人從鳥外憑岸前川忽坼江動石將崩曉
日吞滄海春濤漲廣陵無由消骯髒高處復來登

北固山亭感懷偕魏冰叔

北固山志

卷十

一

絕岸斷千尋亭當斷岸臨地垂天塹險江灌海門深蒼
壁前朝壘荒碑故國吟山川共攀眺人代屢霑襟

甘露寺

兜率何年寺珠宮江上橫塹崖三國壘香界六朝薨高
閣雲根住長廊樹杪行山頭俯城郭夜夜聽鐘聲

多景樓

多景樓高處闌干日夜明水光湍月瀨沙色映煙楹木
落海門闊潮平瓜渚橫一帆江上遠天末望來輕

北固山亭懷古

木末敞秋陰高亭坐獨臨海天東去闊江漢北來深南
國英雄眼中原社稷心昔賢懷望處慷慨欲諭襟

冬初盛宣木蔣懿續同登北固山樓遠眺

孟冬風日好景物似清秋郊外一携手高登北固樓江
空浮晚岫天遠落行舟日暮牛羊入依依尙未休

北固山亭

木末孤亭倚沏寥分明上出半空霄岸臨滄海晴看日
潭俯京江夜聽潮地去北開淮甸遠山來西接建康遙
英雄事業今何在惆悵懷登恨未消

北固山志

卷十

二

北固山樓同六英夜話

散髮洮湖一釣綸風塵高臥老遺民藏書架上三千軸
閉戶人間四十春種竹不嫌茅屋賤攻文甘作布衣貧
今宵剪燭山樓上慷慨同君仔細論

壬申三日集北固江樓修禊

綠楊山外暮春天江閣憑臨江水前掇杜攀蘭修禊事
筆牀詩卷會羣賢佳辰喜恰逢元已人物居然對茂先
此日南徐開洛飲風流不減會稽年

甘露振公禪房

遠公修正地甘露舊名園架閣憑崖石開窗對海門秋
潮生北固夜月上東軒靜裏聞江瀨心清無一言

立春日雍南子發千一同登北固多景樓

山外高樓逢立春共當晴日俯春津江城風景催梅發
水驛煙光入柳新一點下雲瓜步鳥片帆歸浪海門人
無端北望來憑處滿眼河關淚染巾

初春陳七襄何雍南宗子發同登多景樓分賦有

懷程千一王季守不至

千古江山憑傑閣佳時同集最高楹登臨嘯傲賢豪事

北固山志

卷十

三

詩酒風流我輩情暖日晴川看柳發渚城津樹望潮平
歡游旣洽歸來晚却恨曾無二仲并

晚同七襄雍南子發登北固凌雲亭感懷

直上津亭望晚晴危欄高出迥分明西來楚水連天闊
東去吳山入海平落岸帆檣京口渡隔江煙樹廣陵城
四方多難同登眺王粲當應賦早成

時子發避地京江

登凌雲亭有感

吳贊元

北固巍峩枕碧流中蘋外蓼滿江秋凌雲亭上徘徊望
不見荊州與益州

侯公言將軍招同方邵村笪江上兩侍御集垂青
庵卽事庵在甘露寺禪房右 姜鶴儕

空山莫問桂花天支許風流曠世傳最苦狂酣矜俗癖
暫耽幽靜隔塵緣梵鐘開處全非夢軍鼓鳴時半是禪
人物竹林揮塵好清言飛動繡幡前

北固和詩

龔鼎孳

雲廊環古寺古磴蹴空懸萬井寒吹霧千峯淡寫天岷
峨秋漲盡吳楚夕陽連鼓角臨江怨樓船憶往年

多景樓送錢馭少

張九徵

北固山志

卷十

四

故山頻入夢小築乞歸休知己別初聚高朋倦復游河
流天外伏山色望中收遙識陳蕃榻清言破旅愁

彭躬庵方爾止同飲北固

朱 祐

共惜黃花節候陰一尊出郭強行吟江山避客登高淚
風雨催人作賦心匝地烽煙驚雁斷屯雲獵騎射雕深
百年日日悲秋會雙鬢星星已雪侵

花朝北固樓望雨

勞人不記是花朝襍被江頭臥寂寥一夜東風吹雨細
草痕綠過柳青橋

芙蓉樓

朱 賽

落日照京口西風生旅愁芙蓉不可采獨上芙蓉樓鴻雁幾時到滄江終古流空憐春月柳搖落在深秋

吳子錫內兄邀飲甘露望江有感 馬宇陽

削盡芙蓉媚碧空藤蘿芳樹互玲瓏江聲泅泅魚龍上山影追隨煙霧中人到秋來偏有感詩乘豪興自然工欲凌絕壁追天問幾度驚看破浪風

姜開卜招陪李宜中夫子游北固山

孫發祥

北固山志 卷十

五

携筇直上一峯巔極目平沙幾疊煙千里風帆天際出十洲雲樹畫中懸坐深迥若鬚眉古對久翩如襟帶仙半是夕陽留影處醉題泉澗憶當年

訪潘江如隱居

楊志遠

風雨數椽託山麓荒江煙火幾人家夏雲入坐書卷潤江水到門竹木嘉鳥啄櫻桃落胡豆畦翻苦苣栽寒瓜小橋穿徑望非遠好趁明月探青霞

多景樓晚眺次壁間韻

潘之彪

步出北城門携羣探勝蹟崇岡亘山椒迤邐歷雙屐直

上凌雲亭寄懷頗放適雲影與天光萬頃同一碧嶽寄
轟孤峰磊砢路怪石鷗鷺三兩飛帆檣去來織層樓引
遐矚多景殊婉澤遊人穿樹杪網戶傍巖隙商風送海
潮兩岸驚濤拍煙開洲渚清霞映江天赤金焦若雙鬟
微茫挾於腋縱目畫不如茗椀供憇息披襟對晴昊俗
慮爲之抑繁華六朝事滄桑動悲咽流光逝駸駸心曷
爲形役羨彼漁樵子綠蓑臥苔磧海波久不揚頻年烽
火熄霜鬢臨清秋良辰倍珍惜坐嘯復行吟徙倚向日
夕興盡薄言返攀條下絕壁

北固山志

卷十

六

飲多景樓

程世英

江山佳絕處高會足留連吳楚共殘照金焦分晚煙雲
陰寒木末海色落尊前只聽軍聲近吹笳慘暮天

春日北固山漫興

海色陰寒又早潮春城十里綠揚條可堪風雨偏三月
無恙江山閱六朝漁艇浮來當白浪鶯聲遠處入紅橋
石羊往蹟休回首千古興亡濁酒消

北固山中懷人

陳檀禧

晚雲無定相幻出琉璃色青嶂靄重昏茫然不可識須

與素景寒坐我冰壺側忽驚衣裳冷微聞松露滴山靜
鬼火青夜深風露急不覺愴怳間遂令千思集懷人渺
何許佳會杳未的指顧失所歡能不感今昔春華變秋
草魂夢時相憶

春日登甘露寺

蔣超

山寺蜃雲開江光放紫回斷虹埋閣道倒影薄樓臺古
戍煙初息野芳春欲來新晴繞檻處孤客且停哀

登甘露多景樓

王錫珪

大江流不極迴帶有金焦匹練臨吳會寒砧入楚濤雲

北固山志

卷十

七

歸村樹靜月上海天遙咫尺通霄漢何人教弄簫

甘露寺北軒追和杜牧之原韻

宗元鼎

獨步迴廊繞檻行鳥啼花謝正關情感深落月前朝笛
愁絕垂楊故國情帆影東南連水氣梵音朝暮雜潮聲
重來十載題詩客依舊人間浪有名

北固山多景樓臨眺放歌

王士祿

危樓颯爽臨江開襟江冠嶺何崔巍振衣直上俯千仞
恍惚疑躡金銀臺朱方麗崎在襟帶陵巒膠葛紛煙埃
長山遠勢接天目鬱爲京峴形奇瑰別嶺入江此突兀

神龍昂首窺九垓江流如練盡一晌當樽彷彿堪流楮
高檣大舸過枕席來鳧去雁相沿洄金焦貌蹲復鵠跼
左倚右角儼星台仙人播遷海上徙二山終古洪濤堆
噫吁噉北固之鳥道五十里了了下見蕪城隈荀生歎
聲已寂寞蕭公游處餘蒼苔人生不飲亦胡待爲我長
江化酒歸金壘左拍浮邱右洪厓元暉微吟太白續蘇
公大笑揚其頰庶幾陶寫胸中哀古今繚紹不堪把大
江赴海無西迴掉頭長嘯歸去來

北固寄舍弟貽上

北固山志

卷十

八

共知兄弟如皇甫秋水寒松愛此中北固鱸魚四十九
何時期爾釣綸同

海嶽庵拜蘇米二公像

王士正

前輩風流地爲庵易研山淨名猶故蹟摩衲識清顏江
月長如此高人去不還惟應餘翰墨終古照人間

潤州懷古

楚雲直下大江流鐵甕城高落木秋宋帝南徐猶作鎮
蕭公北顧更名樓江山勝蹟留三國海道烽煙動五州
見說孫盧西犯日青燐白浪使人愁

登北固絕頂多景樓

金焦一櫂乘風下
放眼來登北固樓
梁帝旌旗寒浪沒
孫郎勛業甕城秋
千層臺閣凌雲起
萬疊江山拍座浮
自到三山清興極
便乘暇日坐銷憂

海嶽庵研山歌爲朱竹垞賦

海嶽研山不可見
人間空說研山圖
研山之圖亦遭燬
雲煙過眼徒嗟吁
宣和良嶽已塵劫
矧乃片石輕錙銖
永嘉流落幾百載
昭陵玉匣今亦無
詎知神物有呵護
星芒夜隕三天都

舊藏許文穆家

太平宰相盛文物
寶此何啻

北固山志

卷十

九

千璠璣古藤書屋花未放
主人愛客招吾徒
眼中突兀忽見此
乍疑几席羅衡巫
壺中九華那足擬
仇池枉用誇髯蘇
三茅地肺互鉤帶
二華雲氣相縈紆
蛟龍屈蟠待雷雨
仙靈髣髴迴駟車
華蓋一峯獨秀拔
宛插玉笏翹犀株
翠巒玉筍左右列
睢尻股脚相欹扶
上洞下洞閔曲折
潛通小有涵空虛
龍池幽窈驗雨候
頗疑中有驪龍珠
峰獨者蜀屬者嶧
上泉有埒下有瀆
坐客摩挲三歎息
蒼然古色生眉鬚
海嶽之庵書畫舫
幾伴此老浮江湖
巧偷豪奪歷千載
閱盡春秋如螻蛄
翰林好事

過顛米日飡蛾綠忘饑劬滄江夜夜虹貫月莫令光怪
驚菰蘆

北固山

周 璽

樵盤松逕曲引客涉危岑雨霽明山翠秋高薄樹陰潮
來江岸遠鴻入海天深幽事誰人共僧閒伴我吟

寶晉齋研山聯句

周 箕
朱 彝 尊

有石產京峴近來龍目灣周 箕外史火正後愛好情怡

顏彝 尊

棱分崖穴岫垢洗黃朱斑周 箕俄看千仞峯勢拔

方寸間朱 彝

亭亭華蓋倚隱隱却月彎周 箕岡巒各殊狀一

北固山志

卷十

十

一相迴環朱 彝

其下陷空窪髣髴龍所寢周 箕有時風雨至

大小青來還朱 彝

玩物不在多對此形神嫻周 箕以之易園

廬勝絕臨江關朱 彝

觀其賦詩意猶自心偏慳周 箕年深易

顯晦幸未委榛菅朱 彝

君家藏四葉冷光古亦黜周 箕且以

娛寂寞豈復諭銖鍏朱 彝

舉世重黃白孰營几上山周 箕好

語玉蟾蜍勿用青淚潛朱 彝

北固

吳 淇

信宿千秋渚言登萬歲樓星辰仍北固江水自東流秋
色浮瓜步斜陽照石頭淒然傷往事因憶及孫劉

登多景樓懷古

鄒祗謨

飛帆歷歷比浮鷗煙樹遙遙動客愁三月鶯花供着屐
六朝詩賦想登樓蒼茫飛鳥過金剝縹緲垂楊望玉鉤
盡日凭闌看落照還能歌嘯碧峰頭

登北固山

陳之遴

危磴侵雲策杖遙琳宮積翠擁岩堯煙開鐵甕生殘照
風起金山急暮潮飲馬幾回虛割據臥龍從古混漁樵
六朝佳麗依稀在花月春江響玉簫

宿甘露寺聞松聲

張遠

北固山志

卷十

十一

往來如野衲蕭寺寄行踪秋氣涼侵席江濤夜入松月
明何處雨風斷一聲鐘不爲盤根大飛騰已化龍

北固

張玉書

古檜祠堂久寂寥淨名遺築倚山椒檻前碑板留三國
樹杪江聲咽六朝草覆大隄春試馬雨餘多景暮歸樵
可憐萬井炊煙裏鶯鶴羣聲響麗譙

憶北固

百折霜楓路危樓縱目賒江青秋雨後山紫夕陽斜岸
樹搖帆影漁燈亂水涯遙憐鐘磬寂隱隱聽吹笳

北固懷潘江如

江如家在山下

顧夢游

暝色俯蒼然波光接遠天清霜初染樹新月忽平弦有
客秋爲別懷人夜可憐望中棲隱處高柳出墟煙

江如雨過北固山

府志作樓

雨勢截江過山風滿竹扉此時逢客到望處當僧歸豁
達涼生閣空濛翠撲衣高林兼絕頂暑氣向來微

辛卯北固山送春

歲歲留春春不住今年別處是天涯窗前黃鳥清江樹
樓外青山古佛家南浦蘼蕪煙似夢東風楊柳雪爲花

北固山志

卷十

十二

老僧對此還惆悵況是愁人坐日斜

壬辰北固送客

道人住處暑全收客到添衣木末樓江上數峯遙隔雨
山中六月早驚秋屢更物候還飄泊久聚朋情重去留
蓮社但能長置酒豈因蕭瑟問歸舟

壬辰北固送春

留春不住奈春何樓上愁人愁緒多九十日逢晴日少
兩三年是客途過棲煙林暗頻啼鳥欲雪江寒獨釣蓑
擁絮當窗一杯酒和風和雨酌煙波

登北固

無名氏

落拓風塵久登高一愴然煙雲舍萬古蒼莽見當年海

氣浮鷗夢鐘聲亂客眠蕭條懷米老翰墨結前緣

見京江耆

舊集

芙蓉樓

劉鑣

北固多兵壘烽煙接海門城高雲集晚江闊雨來昏野
色芙蓉渡秋聲楓樹村昔人送別處今日尙銷魂

甘露寺

徐緘

絕頂寺仍開孫劉安在哉闌干憑鐵甕鐘鼓接蓬萊雁

北固山志

卷十

十三

破吳雲去江吞蜀雪來旌旗從此渡直到海東迴

九日登多景樓

錢邦寅

山樓風起角聲哀秋色千峯入望開華髮行藏還滯酒
黃花節序祇登臺煙籠遠浦孤帆影雨洗空江一雁來
指顧孫劉征戰處眼前誰是濟川才

癸卯三月十九日潤州客舍同潘江如小飲述懷

四十韻

方文

與君定交初乃在乙酉春是時楊貴竹開府京江濱其
性頗好客客來多俊民史邢暨萬宋才華更清新日夕

造君廬搜豁任天真君尤篤愛我相對但含顰私憂南
國亂汲汲謀隱淪遙指鶯脰湖水鄉風俗淳從無兵燹
患樂彼漁樵人三月十九日先皇之忌辰同登北顧山
仰首號蒼旻野老或見憐朝士反見嗔俄而江北岸鼓
角聲振振君先挈妻子湖村依所親我亦携小婦追隨
爲比鄰此地旣幽僻可以長垂綸君復有遠圖舍我遊
越閩三歲始歸來道路懼百屯我適無所爲賣卜潤城
闔一見喜欲狂茅屋共宵晨曾將賣卜錢買酒醉千巡
無何江上別東西各風塵彈指二十年迴若吳與秦已

北固山志

卷十

十四

亥黃河邊邂逅疑有神因過范生宅連牀話經旬贈答
非一篇相期保松筠別後又五載聞君家益貧田園被
侵奪賦稅猶在身寄居荒山中妻子行負薪癸卯春三
月京江重問津維舟卽相訪奇窮果無倫顛毛種種白
顏面黑且敝破帽與敝衣何減百結鶉况當十九日言
之鼻酸辛仍往北固山亂石迷荆榛旅人不敢上一慟
何繇申是夕返我寓呼童采江蘋取酒酌燈前心曲難
具陳回思廿年事惘如夢中因夜半作此詩龍鐘淚沾
巾

登北固山有感

姜彥淳

江舟聯翩去如馬亭亭特立玉山
下巨鼇屈足地不平
誰作千秋地維者海門距海海欲東
雲濤出沒吾胸中
古來感慨盡由此白眼高歌暮風起

登北固山多景樓

賀希拭

極目波濤接海門登樓愁思不堪諭
平臨兩岫諸峯拱
俯瞰孤城萬馬屯吳蜀霸圖悲寄跡
齊梁事業悵空言
興亡千古都閒事獨弔雙柑處士園

秋日登北固望金焦二

顏象淳

北固山志

卷十

十五

高秋覽勝共躋攀鷲嶺橫波第一山
鐵甕連雲環百雉
金焦破浪出雙鬢孫劉霸業平蕪外
蘇米風流眺望間
却喜水清歌海晏還憑天塹壯江

集北固懷汪舟

吳綺

棹爲看山倚登臨憶往年樓臺百戰後
江海一尊前
醉眼橫天闊離心向日懸有懷春不及
又上木蘭船

坐北固山徑

宗元豫

巨石何年闢微茫一逕分下臨千仞壁
高入幾重雲
地僻人踪絕山空鶴唳聞遙知塵市客
羨我坐氤氳

甘露寺懷古

韓嘉言

岩堯鷲嶺冠南州昔日英雄只土邱鐵甕仍餘王霸氣
江山空鎖古今愁銷沈很石煙光暝寂寞寒潭禾黍秋
徙倚荒亭潮正湧遙看漁浦散羣鷗

登甘露寺

夏誠夏

振衣登北固又復上山巔雲嬾歸青嶂江寒起白煙野
鷗浮靜渚征雁破長天坐定忘歸棹閒吟秋水篇

題研山圖八景

龔聖與

華蓋峯

北固山志

卷十

十六

玉樞承寶蓋清氣開天門雨露在其下何妨草木蕃

月巖

空巖挂滿月萬古光不磨直須端正看始得見山河

玉筍峯

有筍如削玉可表君子林籟龍尙傾日未容不虛心

龍池

萬丈極空澄一泓費收斂若作有物看定自覺幽險

翠巒

舉頭看突兀尺度極高峻翠色常照人定知根地潤

上洞

雲雨受呼吸，猘獠斷扳緣。豈無逃形者，去來小有天。

下洞

哆如木瓢脣，舁如土囊口。虎豹無定居，風雷有時吼。

方壇

方壇妙天界，欲上疑無路。白鶴不歸來，高秋陝風露。

北固證圓木，末樓有先君。畫筵竝眭嵩，年顧與治。

墨跡懸壁

計僑

卓錫峯頭已有年，過從木末俯江天。寒濤雁度夕陽影。

北固山志

卷十

十七

絕壁鐘鳴晚，戍煙牧馬場。中還習靜酒杯身，外且逃禪。
家藏翰墨徵三絕，幸託名山手澤傳。

甘露寺

梅磊

一到幽棲地，身心相與閑。閉門收竹色，選石坐苔斑。茶
味中泠水，僧房北固山。磬聲深夜寂，殘月帶潮還。

北固懷古

孫嘉軾

南徐北雉，千山顧陂陀。出沒排雲霧，茲峯首枕何雄哉。
作屏於坎坤，維固魚龍繞岸，不敢吞奔濤。誤觸還驚去，
扶桑顛倒接海門。長鯨呼吸連瓜步，巍然幻出梵王宮。

碧甃丹垣老藤樹懸崖藤樹不知年上有甘露華其顛
六朝爭勝地衲子談空禪澗絕天津近潭虛秋月圓此
中逸趣須同調相逢欲學蘇門嘯嘯聲面落揚州岸片
帆南北常悠悠歸來擬潑米顛墨記取江流隱現天光
浮

九日同七襄七璐千一石崖登北固山

何 掣

亂雲封樹飛青嶂遠水寒煙走白沙寂寂江山千古在
蕭蕭登眺幾人嗟療生慢憶長房藥對酒惟看元亮花

北固山志

卷十

十八

惆悵孫劉遺墳下空臺風雨洗哀笳

同賀相玉登北固山

王 待

霜落山漸空峯高木逾瘦亭午出郭門五里見遙岫丹
碧錯雲表楓枯隱結搆危徑一綫懸盤轉出山後絕壁
萬仞削白雲飛左右怒石排半空齷齪向人仆攀藤上
峭蒨息足承簷雷孤樓瞰大江眾山羅戶牖仰眺鴻濛
闕俯聽風雷鬪佳游昔已屢雲物驚非舊亭亭煙際松
忽見西陽逗黃葉染清霜飛飛滿衣袖

甘露山亭

葛 筠

江闊半天影危橋秋色閒片帆懸樹杪一騎出花間說
劍談偏劇徵歌興未闌蕭梁成往事疎磬越空山

大風雨登甘露寺望金山

朱一是

少健登高屐重遊忽暮年萬山沉檻外層浪立沙邊風
勢撐江闊溪聲走樹巔一漁如畫裏縮頸荷簑旋

甘露

古寺臨江望渺茫摧殘殿角挂斜陽波翻塔影金山動
門合城陰鐵甕藏楚國雲峯雄入戶吳宮圖畫老迴廊
年年此地聞征戰古戟沉埋春草長

北固山志

卷十

十九

弔羅將軍墓

有引

法重正

將軍名明昇順治乙亥京口值海氛嘗爲犄角
計獻當事戰守可出萬全時惑於攔江之說不
能用城陷將軍戰且死康熙三十八年

南

巡

御舟艤江上

感夢旌忠

特予

廟祀墓在談家洲

十獻龍韜志未成英雄肝膽殉孤城南徐水失攔江計
北府煙消鎮海兵沙上忠魂悲向日波間浩氣怒吞鯨
蕭蕭孤塚埋蘆荻犄角金焦陣勢橫

多景樓望雨

大風獵獵吹黃沙空江渺渺翻白花半天紅霞燒獨樹
兩岸溼雲蒸萬家北山牛羊下來晚西城烏鵲歸飛斜
我亦乘醉出門去霹靂取龍轟雷車

石帆歌贈門人張曾

滔滔走長江浩浩達遠海一槎從中來石帆宛然在地
維絡索天柱檣五丁力士齊開張靈鼉擊鼓蛟挾航朝
遊瑤島夜銀潢迴絕星海迴曲江^叶江上有山海有樹

又海上樹
名石帆

東西那是棲君處別嶺別石潤浦帆君其與

北固山志

卷十

二十

我分仙凡我愛石帆子欲借石帆風直追夸娥鑿穴鼓
大籥鞭策具一一掀江簸海送爾凌蒼穹

甘露寺

程康莊

山樓高擁白雲平萬壑千峯面面生絕壁幾人能試馬
雙柑若個解聽鶯窗寒夜月迷秋色石鼓松濤起梵聲
羨得鱸魚垂釣叟曾來沽酒向江城

登多景樓

蔡彬

欲盡風濤險來登多景樓綠團瓜步樹青捲大沙洲艫
舳輕鷗逝金焦雙嶺浮西齋留很石吳蜀已墟邱

登北固山

姜文燦

興來策杖蒼山路雲水鞦韆聽鳥喧絕壁當年曾立馬
旂亭此日一開樽千帆雨色連瓜步萬里潮聲出海門
盡日登臨何限意揚州燈火近黃昏

多景樓

丁尹

北固秋深眺碧天海門雙嶼列樓前江澄是處晴浮練
林靜遙空畫合煙隴稻黃雲圍草舍洲蘆白雪映漁船
躋攀欲去仍留戀無限詩材待我聯

晚過北固山

楊滋夔

北固山志

卷十

二十一

日暮耽遊興悠然著屐過雲沉山色遠風急樹聲多古
寺來鐘磬高城挂薜蘿壯心猶未已徒自羨煙波

登北固山

荆德珩

迴嶺斗絕煙雲裏練飛鏡平澈伊邇漁艇亂芥浮均堂
蘆洲纖毫落畫紙天臨鐵塔隻手擎地湧石帆三面峙
卉香夾徑交芳妍花蔓懸崖散青紫風生兩腋夢亦清
露墜連珠潤且旨伊余前身飲金莖彷彿仙掌今游是
潭空秋靜揚冰輪疑照遙澗奔騎駛謝公軍儲懷當年
梁帝闌楯付逝水何似閒鷗宿沙湍不知鶴唳警戎壘

潮聲鐘聲同寂喧南船北船互行止修篁百尺干霄生
盛暑之時虐威徙山中池清鳳欲儀山底雷動龍思起
等閒都借濁醪澆放眼乾坤泡影耳

重遊北固山甘露寺從澗道過放生池慨然有作

宋 犖

凌晨訪名山細草芳洲路峯嶺亘江天樓臺出煙霧盤
紆叢篠深淅瀝清泉注探奇憶疇昔如駛流年度茲遊
氣象殊初地添新戍嵯峨舊講堂列戟老兵駐當時飯
僧釜刀劔久鎔鑄雕楹梁帝書摧折等林樹遊人偶經

北固山志

卷十

二十二

過蹶踏生恐怖山巔古石亭曠覽欣如故依稀揚州塔
突兀雲間露鴻濤萬里來蕩潏朝還暮孰知人事遷抑
鬱傷情愫老僧三四人幾載禪房寓較予爲後來安能
話平素山陰放生池磻道莽回互蒙茸荆棘生樵牧不
復顧我行曳短筇石磴屢停步既至殿宇頽誰氏新加
堊曩者三尺魚游泳生意足臨流倚曲檻朱鬣不知數
一旦化爲田牟麥青青布惟餘蘿洞存絕壁斜陽住三
歎共僧徒俛俯得深悟望望野薔薇微香風際吐

北固山懷古

楊靜乾

拾級登臨最上頭金焦兩點望中收東橫海氣青天溼
西瞰嵐光日月浮花塢客來雙臘屐柳溪人去一扁舟
英雄事業空回首可似長江不斷流

遊甘露寺

吳代

盤迴鐵甕壓金焦紀勝江邊第一標俯覽鳳池涵碧落
仰尋龍埂近丹霄危樓曉色凌多景絕壁秋聲帶遠潮
信是長風來萬里梵宮早已暑全消

石帆樓

吳美

風景憑欄一目收此身高踞石帆樓江分南北三山峙

北固山志

卷十

二十三

地控荆襄萬里流瓜步潮平縈建業銀峯雪霽照揚州
年年士女新妝出兩點金焦作勝遊

很石

姜奭

舊在甘露寺形如伏獬相傳武侯坐此論兵
伏獬何爲者片石臥山前不有武侯坐到今誰復傳風
霜鍊山骨苔蘚老雲煙孫劉遺勝蹟懷古興踰躑

多景樓送吳園次赴任湖州

孫枝蔚

出城送客共躋攀萬里煙雲杳靄間天下江山如此少
古來冠蓋幾人閑潮頭日午添帆影樓角風微散酒顏

五馬臨行重回首故知魚鳥最相關

登北固山

幾年思北固不忍倦南游遙對千帆影能空六代愁人
行江鳥路樹帶海雲秋望裏山皆好全將爽氣收

北固野眺

談志

南徐三月後北固大江邊雨脚收將盡潮頭落未全野
田平綠水村樹帶輕煙不盡鷗鳧興沙汀向遠天

北固山下柳青橋酒家

潘陸

春風爛熳百花朝山上紅芳江上潮過盡游人看不厭

北固山志

卷十

二十四

日斜半醉柳青橋

北固

潘耒

地設南徐險山留北固名女牆蒸土築很石撼潮生木
杪樓臺湧雲中鼓角驚謝郎垂釣處出手見生平

多景樓

蕭瑟江樓坐煙光向晚重寒村攢橘柚落日沸魚龍帆
送中流笛杯傾隔岸鐘三山不敢賦彩筆有前踪

家木
公先

生三山賦
刻石在壁

甘露

丁澍臣

懸崖突兀逼晴空名列三山勢獨雄疊嶂嶙峋環鐵甕
危樓高下瞰蛟宮凌雲高峻晴飛鶴秋月潭深夜吐虹
遙憶孫劉空霸氣好將杯酒醉西風

登北固山樓

陳玉璣

匹馬凭孤嶂危城控上游魚龍一夜靜吳楚萬家浮獨
客來江閣層雲結海樓茫茫沙島外千里暮煙愁

阻風上多景樓

沈德潛

甘露寺前雲作門多景樓下雲爲屯天風欲搖嵐嶺動
山勢疑逐波濤奔瓜步帆檣沙際泊蕪城煙樹望中昏

北固山志

卷十

二十五

鄉關咫尺阻歸路寂寞寒江斷客魂

甘露寺

高閣眞疑坐九霄鐘聲遠送海門潮峯巔片石留三國
檻外長江咽六朝何處雲煙辨吳楚此間蒼翠壓金焦
老僧猶說孫恩亂白骨青燐尙未消

過何將軍園四首

園在北固山甘露寺下依山石作障穿江流爲
池沿隄百頃雜植花木人擬之韋曲山林云

江山眞第一率府構名園石記三分國池通萬里源鐘

聲天際落旗影望中翻時許遊人到花間駐短轅
此地疑韋曲同遊得鄭虔松門雲啟閉莎岸客沿緣野
鴨將雛小行魚聚沫圓風潭連百頃頓異舊山川
戎馬清時歇亭臺勝地高鹿銜新出草鶯坐欲開桃傍
水揮金碗臨風解錦袍共誇休沐處符竹有勳勞
三載南徐客千重北固雲尋幽從所好得句張吾軍陸
賈慚無武閭公本愛文流連坐泉石不覺已斜曛

宿甘露山房

章性良

酒酣重散步乘興上層巒籬落吹殘葉江流瀉急湍輕

北固山志

卷十

二十六

雲籠月淡重露入風寒漸覺秋衣薄盤桓已夜闌

甘露山房次張處沖韻

炎暑山房胥客踪閑緣危磴一枝筇新苗飽雨青長畝
殘日烘雲赭遠峯潮湧片帆遲泊岸崖深六月早聞蟲
星河耿耿漁燈亂屋角林虛起夜鐘

柳青橋訪潘江如先生故居

程兆熊

高士淪亡久書堂賸落暉空憐芳草路上有白鷗飛悵
望春江晚蕭條過客稀年年橋畔柳猶自拂人衣

薄暮登木末樓卽事

余京

雁背遙翻落照來樓登木末客徘徊江山曠劫爭棋局
燈火光陰促酒杯萬里人煙秋慘淡百年戎馬地蒿萊
西風歸路吹殘醉雲掩高城畫角哀

北固山懷古

北固峩峩枕碧流登臨霸跡憶孫劉百年戎馬三分國
千古江山一倚樓鐵甕日沈殘角起海門風靜暮潮收
故宮舊壘知何處野荻寒蘆歲歲秋

笠庵

韓采

千丈芙蓉嶺下堂白雲自分少炎涼來探七月江楓信

北固山志

卷十

二十七

因悟三生石佛香山海氣雄吞大壑魚龍秋冷抱斜陽
却憐老向林泉臥世路風帆夢已忘

北固山

丁振華

走馬南徐路停鞭北固前長廊盤石磴古剎倚江天雪
柏留唐跡霜鋒沒漢年登臨情不盡翹首夕陽邊

北固山

姜令訪

鐵甕控名山北固環其北長隄何螭蜿峭壁自奇特高
踞最上頭江天豁胸臆左右峙金焦彷彿三島域長嘯
草木震劒石隱荆棘欲起孫劉語我恨無終極何不肖

桓文天王輔孱國不見竇河西至今照顏色日落盡此
杯四山皆默默惟聞梵磬聲心定塵心息

京口待潮繫舟北固山下

夢麟

水國多晝陰輕霏散空宇維舟候暮潮孤帆落前渚北
風生薄寒青山動孤溲天盡海門煙雁下蘆洲雨殘霧
滿空江臥聽舟人語

北固絕頂眺望

鐵甕城高落木荒支筇北固一迴腸天容帶雨連空沒
日氣沈波到海黃客足祗今歸汗漫江聲終古慟興亡
傷心龍虎皆消歇薄暮風吹鬢有霜

北固山志

卷十

二十八

登北固山

王曜升

雄峯高枕瓮城斜有客登臨送晚霞水氣暗吞山頂寺
江雲遙護海門沙天低雁鷺來千里地迴星河落萬家
指點舊朝形勝在吹愁何處起悲笳

北固山醉歌

張曾

海魚吐霞半空紫霞飛散入秋江裏薄晚風濤捲地來
片片石帆吹不起隔江莽蒼寒煙蘿海門一峯跳白波
坐久風收江面闊明鏡皎皎何人磨江南諸山翠如擁

落日奔濤浮玉動不知月向海底生夜光已照魚龍夢
山人把酒吟且謳斯須月到山間樓倚樓問月月不語
海若奮怒山鬼愁天邊桂樹又吹落直愁月去人寂寞
月來月去幾何時江山顏色都非昨山人一歌復一杯
更酌再歌呼月來噫吁嘻明日見月還把酒無使酒盡
月空走

凌雲亭醉歌

水光秋變白石骨冷逾青天地能容我江山着此亭沙
沈尋折戟酒盡棄空餅日暮悲歌起蛟龍不解聽

北固山志

卷十

二十九

雨宿笠庵

山雨忽然收風生古石樓飛來半輪月洗出一天秋水
鳥棲仍起寒螢溼不流此時孤枕興吟嘯助漁謳

中秋同友人北固山亭看山

鹿泉

中秋豪放俯波瀾萬里冰霜片月寒島嶼分明星漢闊
江山佳麗酒杯寬離人對節家鄉遠征雁驚秋道路難
故國登臨莫惆悵諸君况復盡交歡

石帆山下看桃花

石帆山自古不下武陵中落日千株豔春潮萬井紅興

酣非酒醉路斷有舟通此地足堪隱誰能過小風帆

張一石

登北固山

胡應昇

北固傳名跡登高紀勝游晴雲生海嶠宿漲罨沙洲詩
爲樊川寄齋從米氏留曉來波浪闊古木響鉤輶

甘露寺

陳公位

巍巍蕭寺鎮驚瀾北固山頭立馬看雄障甕城知地險
危臨江滸覺天寬濤翻白日鼉鼉吼旗捲西風壁壘寒
霸業西風何處問空留片石枕沙灘

北固山志

卷十

三十

試劒石

丁士佺

江濱峻嶺青岩堯秋深草木寒不凋想見英雄尙豪氣
劒光拂拭天爲高有時把酒顏色赤壯心陡起提三尺
腰間隱隱聞雷鳴一聲斫地裂白石石如掌劈露古痕
至今一片蒼雲屯神鞭留血今復見飛笥沒羽詎足論
英雄大去劒亦失青山未改當年色欲尋舊跡心茫然
君不見石上苔斑半侵蝕

石帆山

蔡之定

謝蔡軍儲此舊屯千秋遺集一峯尊山連閣道通天座

風挾江湖赴海門，鐵塔下臨無地處。
琳宮高插夕陽根，觀音洞口潺潺水。
流盡秋潭月半痕。

海嶽樓感懷

銅坑京峴脈回環，北固名區繚曲間。
蘇米風流餘翰墨，晉唐形勝屬江山。
四圍雲樹深藏塢，幾處煙鐘靜掩關。
百尺樓頭新月上，憑闌喜得趁蕭閒。

陪儉齋都統登北固山房

紅旆移香阜，層梯許共攀。
行來青嶂曲，坐對白雲間。
但覺望無際，不知身在山。
酒邊新月落，涼氣滿松關。

北固山志 卷十

三十一

汲鰻井水煎茶

張國謨

北固山前古井存，試茶有客指禪門。
當年偶見雙鰻出，此日還將八餅論。
彩袖輕翻風弄影，銀餅斜抱月留痕。
只緣地脈通揚子，味比中泠共一源。

甘露寺鐵浮圖歌

管兆桂

甘露鐵塔擎孤峯，巍巍永鎮江之東。
層累直上千百仞，洪鑪煅煉驚神工。
風鈴旋繞十一級，崢嶸八角飛玲瓏。
龍埂擁護勢拏攫，盤旋天矯騰蒼穹。
試問鼓鑄自何代，僉云作始李衛公。
想因精魅肆奇毒，仗倚佛力壓羣兇。

凌雲亭畔一縱目更有六塔來朝宗揚州二塔若拱揖
或隱或現煙濛濛城南塔低等陪隸金山塔對垂雙虹
東園一塔矗天漢相與鼎足爭長雄眾塔木石皆易朽
獨此聚鐵堅難攻誰云金剛身不壞幾經歷劫遭祝融
高僧重建繼裴璩萬厯規制勝元豐唐宋距今約千載
世事更變如轉蓬大冶鼓鑄空卽色鐵圍頑毀色卽空
或空或色兩無着釋迦說法開愚蒙嗚呼海枯石爛只
一瞬萬象變幻大都與此鐵塔同

秋日登北固

北固山志

卷十

三十二

縱目江天外寒生百尺樓濤聲過象嶺樹色接瓜州東
晉名流杳南朝古寺留何堪懷往事蕭瑟荻花秋

遊何將軍園亭

李天塹

雅歌選勝愛投壺松奏笙簧水奏竽褒鄂弓刀閒不試
且開江上輞川圖

早春登凌雲亭見山麓新種桃柳喜賦

郭家駒

萬木春回到古亭俛看桃柳補雲屏未知何日開如錦
且喜名山色更青天外巡花應有使石根種樹豈無經

不須再訪漁郎去江上還尋舊釣盟

多景樓夕眺遙和步江

劉夢儔

乘興人登多景樓層檐曲檻俯江流輕煙暖樹千家暮
素練橫天一水秋城背雁聲催畫角江心鷺影趁漁舟
嗟余歧路分南北未共參軍覽勝游

雨中登北固

袁 亨

扶杖來參畫裏禪眾山齊到

本作向

此山巔何人放眼空

千古我憶題詩又十年匝地樓臺雙徑合際天江海一
帆懸而今木末同僧倚涼雨瀟瀟冷暮煙

北固山志

卷十

三十三

北固秋望

雲暗金鼇寺秋高鐵甕城羣山排野闊遙海抱天清落
木無人掃孤亭有雁鳴我來頻弔古蕭寺起鐘聲

秋日飲北固山房

把酒看黃葉尋詩到翠微江空先得月雲冷欲沾衣絕
壁凌千仞遙天抱四圍荒臺一回首征雁已南飛

笠庵晚步

嚴 本

暝色重簷下幽尋古渡前寒流亂斜日破寺冷孤煙犬
吠編籬逕僧歸種芋田却憐塵俗遠心賞自泠然

臨江亭

吳一麒

東吳嚴鎖鑰北固列重關地引三江水天分半壁山蕪
城春樹杪瓜渚暮舟還俯瞰空潭寂微茫月一灣
昔年登眺地今日又重來江月渾如舊山花落更開功
名留很石事業委荒臺六代繁華盡春波洗酒杯

從笠庵放舟登焦巖

戴純

江風吹竹徑春入海門寒水木疊青靄蛟龍護紫壇浪
高帆影側山老石紋乾長嘯登舟去煙波正未闌

秋日和吳筠登北固望海詩

徐豫朋

北固山志

卷十

三十四

木落蜃氣靜遠見海水湄魚龍隱出沒洪波日夜馳陽
精挂扶桑的爍燦高枝浩渺渾元氣磅礴耀西儀三山
信伊邇咫尺疑可期極目任遙望憑高抒清辭

木末樓晚眺

林瑞

高樓突起木之末我今來登木末樓山勢南來千嶂列
濤聲東下一江流潮翻落照金鼇動風入疎林鐵馬遁
薄暮憑欄數聲鳥紛紛樹杪晚煙收

笠庵

臧本端

峭壁面江立北固峙高岑下有古笠庵掩映疎竹林入

門聞妙香閬靜禪房深慈烏啄苔坡鼯鼠跳松陰蒼暝
日易暮生我塵外心於焉共吟賞瀟灑披青襟

甘露寺感舊呈夢樓主人

并序

袁枚

己未冬予乞假歸娶路過京口值商寶意前輩
適爲郡中司馬命公子某陪遊甘露今四十年
矣中秋前一日王夢樓侍讀招飲此間追憶前
遊悽然有作

記得當年此地經雪花寒重錦袍輕酒邊綠鬢初垂影
山上蒼松半未生卅載韶光春易過一條狹磴老難行

北固山志

卷十

三十五

憑欄暗轉衷腸事江水無情浪有聲

木天署裏老詩翁曾縮仙符碧海東要把江山付詞客
特教公子伴花驄西川賓從人重到北海琴尊事已空
難得多情王太史開筵重與醉西風

和保堂甘露寺詠李德裕之作

趙翼

千步禪林列宿環衛公曾此躡屣顏杖無方竹留蕭寺

泉有中泠敵惠山

公在長安用水
遞致惠山泉

口福想因羊食盡清波

雜志公應
食一萬羊

羈魂難附鳥飛還

公在海外有詩云獨上年
樓望帝京鳥飛猶是半年

程 倘煩相度消朋黨千載英名孰許攀

登木末樓

劉守中

日暮鐘聲起山寒枕急流青天一片月水郭萬家秋遠
浪翻江壁輕帆落成樓由來重鎮地殘角使人愁

初夏同人集多景樓

程夢湘

欄檻空明過雨涼攀林蹋閣俯蒼茫樹無賸綠分瓜渚
山有餘青入建康獨客送春愁並遠羣公消夏日初長
銀鱗玉筍開樽好笑指沙鷗醉夕陽

笠庵

竹屋巖花的的稻田流水潺潺只有漁兄漁弟門前日

北固山志

卷十

二十六

日往還

將赴南河留別寶晉書院諸生黎世序

江天海嶽壯文瀾北固山齋拭目看問字我慚一日長
研經君耐九秋寒曾追蘇米敦絃誦敢向河淮策治安
臨別片言須記取科名容易立身難

登北固

殷成柱

曲磴重懷李衛公蒼茫古寺徧西風樓臺晚出江聲上
雲木高沈海氣中天遠雙峯橫絕浦山寒孤塔對青楓
霜帆遙指空沙外閱盡興亡是塞鴻

坐寶蓮庵

馬垂範

開窗見青山如對古人語一帶綠陰中秋聲在何許

多景樓

萬 涵

縹緲飛薨壯觀遊當年鶴氅擅高樓卷簾雨洗南山翠
背郭江鳴北渚秋終古登臨餘感慨一時賓從自風流
月華臺畔多春柳玉柱金觴見昔游

北固山

襟帶金焦一水間褰裳端足長三山衛公孤塔春雲冷
梁帝層樓夕照閒門倚跨鼇橫鷺白澗穿走馬破苔斑
自從謝客撚塵網時爲鱸魚夢釣灣

北固山志

卷十

三十七

書北固山舊讀書處

丁日乾

少年歌嘯春江外今見蘆洲戰壘邊鐵甕日殘嘶獵馬
金焦風勁下樓船山中短榻禪燈在橋畔垂楊酒市遷
到此那能重寄想眼中帆影入遙天

北固

失名

見乾隆
前抄本

來登北固最高樓取次躋攀選勝游載酒踏開芳草路
揮毫題徹白雲樓一江潮水喧揚子滿目昏煙鎖潤州
指顧千年試劒石不堪憑弔說孫劉

北固尋海嶽庵舊趾

劉梁楨

南宮人不見遺照想輝光
姓氏當元祐風流剩草堂
殘碑扶蔓草饑鼠走空廊
大雅今誰續烽煙繞戰場

登北固山入甘露寺

周廷諤

不盡江聲走東南湧一峰
乍來空谷屐忽動上方鐘
鳥破雲千疊僧歸翠幾重
疑從天半立足底仗孤筇

甘露寺

馬日琯

斷甃猶存劫火銷祇憑絕頂看
金焦我來十月霜風厲
紅葉飄零似六朝

北固山志

卷十

三十八

登北固山

費錫琮

絕嶺橫江岸登臨望渺然
潮來徐福島山出寄奴泉
境界分吳楚波濤混海天
千秋爭戰地今喜靖烽煙

北固秋望

鮑 臯

風高海遠雁啼聲天末樓臺上
晚晴山合金焦三割據
江分吳楚兩縱衡孤城立馬寒
雲闊絕浦收帆落日平
欲作江南秋望賦少年誰是庾
蘭成

秣陵煙樹廣陵花入眼興亡逐
海霞故國臙肢空有井
中洲鴻雁已無家草生夾岸沉
簫管柳盡橫歌葬綺紗

南北莫言天限絕長江一水厭繁華

秋色千家帶郭昏英雄已矣霸圖存赭衣舊厭秦皇氣
黃鶴虛招宋帝魂夜冷一燈懸佛閣月明雙旆動軍門
年來海國樓船靜尙有如山鐵騎屯

潮落空沙起雪鷗臨江橫笛唱瓜洲芙蓉紅怨佳人暮
楓葉青傷帝子秋南渡煙波深臥病西風天地老離憂
關河萬里寒霜露人在蕭蕭木末樓

木末樓夜集同旭朝組五

木末樓高暝色昏難逢知己共開尊丁年江上多離別

北固山志

卷十

三十九

乙夜山中細討論石壁藤蘿燈火動海門風雨酒杯翻
來朝莫望揚州樹此地曾銷幾度魂

甘露寺兩畫壁歌

山上老鶴側下地山下老竹直上天上山下山數千仞
中有雲氣青連綿畫師故是最神筆流傳好事疑神仙
金焦簸動地維拆大小盤空落雙翮崩雷屑雨不敢侵
返景三竿留素壁誰歟畫竹宗大成畫鶴依稀記姓名
第一江山對磅礴無數擅場此兩生甲巳之間何草草
北府臨江兵氣繞莫識柯亭中笛材空嗟遼海歸華表

切雲麗漢屬烽煙丹青黝堊重依然何物神明相爲守
至今圖畫獨能全張僧繇陸探微霓衣冰紈亦已化青
貌盤跚安可追當時亦遣鬼神守煙渚冥茫嗟已久况
茲瓦礫與荆榛奚憑妙跡千年後妙跡千年摹不得今
日煙煤聊拂拭接引殿前遊屐稀歲歲櫻桃花笑客

多景樓晚眺

多景樓前景不同六朝人遠思何窮雲山晚變江光外
煙井秋寒樹色中滿地波濤空北固一天禾黍自西風
蕭梁舊事分明在返照千尋石壁紅

北固山志

卷十

四十

石帆歌爲張組五作

湘帆面面隨湘轉湘江欲斷帆不斷君從何處得石帆
將比湘江長一半天河潤瀆雲海深迴風滔日山浮沉
玉繩貫中虹作纜挂之直上秋天心秋天淫淫雰霧雨
問君崎傾泊何處君不見羅浮山浮海上來一泊羅山
不浮去江上之山曰北固石帆歸來棲泊處潦倒參軍
爲作銘千丈磨崖題鐵柱

北固山

佳麗南朝返照中山形依舊亘如虹獨當一面長江險

鼎足三分北顧雄走馬澗空秋夜月跨鼇門撼海天風
千年鐵塔神猶護梁武何如李衛公

經北固山下故何將軍園林感述

何氏園林傍戰場將軍大樹鬱蒼蒼稠花亂蕊空春日
疊鼓凝笳自夕陽驃騎去官休沐廢南宮遺宅淨名荒
從來此地多冠蓋爲問誰耽野趣長

故何將軍園林題壁

苔蝕橋梁水咽流蘋花林葉一塘秋南園亦有閒池館

此故將軍彼故侯

南園在潤城南隅故一
等侯馬三奇別業

北固山志

卷十

四十一

泊北固山下入甘露寺訪六朝遺蹟

王昶

一試乳井泉再啜新豐酒秋風向晚寒瑟瑟凋煙柳江
山合雄俊勝概數京口蕭郎昔北顧嘉稱被陵阜何時
壽邱荒空見很石醜飛揚蓋世才寂寞千載後玉蘂亭
亦無崖州但回首甘露獨巋然僧伽傳最久落照下長
波紫氣無不有樓臺儼畫圖形勢抱跟肘海月猶未生
奔濤激林藪

除夕前二日同鮑步江登木末樓 張國謨

飛樓縱目極高寬
返照千家霽色寒
歲臘共驚三八盡
江山如待兩人看
蒼煙白鳥吟來穩
積雪空林畫出難
瞬息風光蘋末轉
一尊重爲罄交歡

走馬澗下

自注在北固山下俗名駐馬坡

折坂臨流不辨蹊
芒鞋踏處草萋萋
曉晴時見山僧過
暮雨惟聞野鳥啼
危不持人隨步轉
蔓藤繞笠上肩齊
樵夫指說滄桑事
曲逕曾留駐馬泥

秋月潭

藏舟訪遺跡
扶杖過山家
無復空潭影
惟餘峭壁斜
林

北固山志

卷十

四十二

深時見月莎淺夜鳴蛙
古字煙嵐裏秋風落野花

登北固山

鐵保

江流如玦擁孤亭
萬嶂西來勢莫傾
蛇鳥壁高嚴北府
珊瑚氣冷逼東溟
帆隨雁度低昂白
雨壓潮來遠近青
戎馬管絃俱寂寞
沙鷗依舊下寒汀

米南宮研山歌

袁燮和

南唐寶研異凡石
峭鑿峯巒有奇跡
瓊瓏本是天生成
三十六峯鬼神闢
方壇玉笋相鉤連
捲旗華蓋留餘妍
坡陀矗立翠崖接
東西位置如摩肩
九華日月壺中始

五岳煙雲方寸起洞分上下舍虛明一點靈犀暗通裏
龍池驗雨藏驪珠經旬滴水猶霑濡良田方廣復溫潤
筆耕定有心花舒襄陽搆得清齋供神物莫作等閒用
呼兄百拜何顛狂日夜摩挲自珍重仲恭入手再見難
償以別墅心甯安寶晉建閣繪圖在遂教秀氣無摧殘
古來名物由人顯周鼎商彝存舊典可憐兵火遭塵埋
剩水殘山澀苔蘚梅花道士能繪摩旁留隸注名非訛
空齋披閱拂眞蹟翰墨千載光秋螺

北固山循江濱訪月波詩屋

王文治

北固山志

卷十

四十三

蕭瑟江干路新寒上客衣秋風牧馬地落日釣魚磯北
固橫青靄西津擁翠微故人詩屋在臨水叩柴扉

初夏同程衡帆韓思穆鮑雅堂飲北固山下

落落山川勝茫茫人代遙沉戈與折戟今日未全消草
色侵衣帶花香入酒瓢春光留不住新綠已遮橋
峻嶺攀緣徧臨風引一尊清江歸大海紅日落平原顏
謝驚人句齊梁古帝魂凌雲亭外立下界又黃昏

秋日登北固山

畫角聲中牧馬迴西風落日此徘徊沉戈難得孫劉蹟

載筆猶傳顏謝才江帶雉城千舸艦澗盤鳥道萬樓臺
東流一片蒼茫意欲向空門問劫灰

潘曉樓人日招飲北固山下

北固孤峯聳碧天閒居潘令愛周旋雲銜晚日穿林外
雪擁晴山落檻前人事飄零惟舊雨春江蕉萃入新年
酒酣倚劔重吟望此地興衰倍可憐

山帶閣納涼閣在北固山之半

峯腰小閣坐披襟閣外鳴蟬雜梵音日轉松杉交路暗
雲隨帆席過江陰追涼不覺青山暮道故何辭玉盞深

北固山志

卷十

四十四

況是司勳憑眺地北軒闌檻到如今

唐耀卿招遊北固山口號

山上招提山下村江煙樹影作黃昏半規新月藤蘿外
直送游人入郭門

胡東望招諸同人北固山僧樓觀大閱

大江橫截萬山青北府軍門擁畫屏鼓角殷雷驚地軸
旌旗耀日應天星三軍同詣招提路百戰曾焚老上庭

東望征小金川屢奏奇績指點陣圖忠義發燕然仍擬勒新銘

九日招魯子山進士韓蔚山孝廉遊甘露寺

茅元銘

北固山頭寺新晴曳杖過江空秋色遠樓破夕陽多高
詠已陳迹蕭辰空浩歌老僧閒指點無礙是滄波

重遊北固題甘露寺壁

李御

九秋游易數况復望高閑寺賸三分國城圍本作一角區

山石根攢截本作崕壁蘚繡苔斑如此風雲地蕭條古

佛顏

畫壁迴廊破青苔古殿陰於人羞落魄對佛見高心廚
冷煙霞積堂封鼠雀深空堦下黃葉翠柏自森森

北固山志 卷十

四十五

寶晉齋何在祠堂長老園鬚眉鑄石壁俎豆托松門雲
散丹徒氣兵銷北府整文章獨千古此室許誰諭

共紀蒼鷗素逍遙復惘然聲華歸噩夢憂患到中年地
迴悲秋易身孤本作閒學遜便生涯村杯酒遮若眾呼顛

北固山晚眺

李堯階

四山沉暮靄寒意滿松杉隔院聞清磬開窗落遠帆江
聲凌海嶽樹色暗焦巖獨有僧家靜雲房經一函

丁卯五月下浣北固山訪石雷上人卽席賦贈時

望雨甚切

洪亮吉

瓜步潮聲到此回寺門遙對象山開煮茶曉汲雲頭露
破夢春暄石脅雷古佛一軀全點黛枯僧百念總成灰
原空如燒岡如炙何日江神送雨來

人皮鼓 有序

李僊枝

明嘉靖時都督湯寬戮海寇王良皮所鞞予見
之於甘露寺

昔聞海中有小醜依倚島嶼爲屏藩時出大洋犯海口
嘯聚儔類如雲屯都督湯公神且武如貔如虎師旅振
卽日掃平渠魁執髑髏殘血污轅門其肉可食其骨醢

北固山志

卷十

四十六

其皮不寢鞞作鼗鼗鼓鼓軍軍氣作三軍踴躍毋逡巡
異樣新裁古未有鞞人疏增周禮文羯皮一作鼓鼉革誰

得似肌理細膩無微皺逢逢響震賊膽破殷殷聲飛北
魄奔海若驚聞亦吐舌魍魎叫嘯都亡羣至今流傳二
百載殷紅釁染猶鮮新我聞馬援征交趾銅鼓一擊成
奇勳馬革裹尸名不朽凜凜正氣千秋存此鼓亦當共
揚摧胡爲寂寞歸祇園君不見文明累洽六宇泰安瀾
四海無妖氛禪堂代搗天魔悸鐘磬細響徒錚錚

九日同人登北固山樓

鮑之鍾

駐馬坡前曲磴回百年幾共故人來
幘隨涼葉無心墮
帆逐晴雲得意開
健翮轉空爲道路
中流卷霧出樓臺
不須聽盡黃河曲
欲瀉清江入酒杯

北固山樓晚眺同王夢樓

張祜題詩處風流直到今
江光潮半落山靄日初沈
喜與故人共因傷久客心
鄉園知信美北望暮雲深

山帶閣納涼同夢樓衡帆

高窗面面逐江開
清駛當軒拂袖來
消暇羣公時載酒
迎涼吾輩此登臺
晴雲擘絮連山捲
飛鳥驚人遠檻迴

北固山志

卷十

四十七

羨絕山中棲隱客
晚風樹外聽輕雷

木末樓聽潮

飛樓直下俯嵯峨
霜落寒潮擁白波
峽迥欲流山影去
風高更挾樹聲多
驚心逝水頻傾耳
回首滄洲一放歌
此日觀濤誰作賦
枚生老去待如何

鐵塔歌

江干鐵塔何巍巍
凌雲亭外橫岩阿
衛公創建自唐代
支擎日月凌滄波
我來甘露親摩挲
絕頂光耀何人磨
昔聞彥章雄鼓鑄
鐵篙爭看琉璃河
又聞旌陽鎖鐵柱

鎮以符錄驅妖魔此塔峻嶒亦自有奇氣毋乃下燭幽
怪驚蛟鼉嗚呼孫劉霸業故宮在西風牧馬空黍禾登
樓一覽弔千古沉沙折戟含煙蘿劒鋒斫石石已裂斜
暉淡淡迎坡陀孤塔獨受風霜多不隨荆棘埋銅駝况
兼七塔邑志注七塔揚州二儀徵一圖隱約現參差回
晤山如螺

九月一日同夢樓先生登凌雲亭 鮑之諭

寥落平生萬里心白頭携手此登臨別開世界詩天地
不盡蒼茫秋古今老屋江濱容我坐危樓木末待君吟

北固山志 卷十 四十八

相看對菊人猶健有約重陽好重尋

登北固山 陸貽穀

攬勝初登北固山徘徊曲磴躡孱顏一江煙水無邊闊
兩點金焦指顧間

九日同茅耕亭魯子山遊甘露寺 韓 璟

古寺鬱嵯峩佳辰結伴過夕陽高閣迴黃葉晚風多霸
業餘流水空江一放歌遙看垂釣者終日坐煙蘿

鎮江甘露寺題壁 曾 燠

千古英雄入佛多劫灰無數此山阿夜寒東塔霜鐘響

落向空江捲逝波

和劉雪盃登北固山韻

王賡言

到此方知天地寬十洲三島足奇觀神仙處處留鴻爪
雲水茫茫冷釣竿萬里波恬龍睡穩一樓霜緊雁聲寒
妙高臺上題詩處斜日微風漾紫瀾

過北固山房

屠倬

笑携北府兵厨酒同訪南宮海嶽庵天放雲山供畫藁
僧添松竹護精藍霜清木落空千里禪悅詩情占一龕
遙指孤亭當臥榻尙留殘雪點晴嵐

北固山志

卷十

四十九

贈北固山石雷上人次洪稚存前輩韻

雙扉剝啄徑紆迴磬口花爭破臘梅垂老山中忘歲月
論交方外得宗雷誅茅有地曾飛錫煨芋何心更撥灰
留此新詩記遊跡江山第一我初來

北固山有宋吳琚書天下第一江山

贈北固山石雷上人卽和洪稚存先生韻

茅元輅

山形宛轉抱城回佛國樓臺絕頂開峭壁截江晴有霧
奔潮出海夜聞雷人歸絕域增生氣

先生自西域歸

僧悟西方

證死灰名衲詩仙吟勝地都從宿世結緣來

琴娘曲

王 曇

江上晴雲晝如絮紅梨花底紅禽語紅禽樓下逐花飛
樓上紅飛墮樓語金閨昔日琴娘嫁銀鑪爇麝檀郎夜
珊瑚枕絮不成眠玳瑁妝花未曾卸鯨鯢唐突月翻營
蜂蛾一旅雪登城當時鳳吹樓頭曲今日鶯啼馬上聲
敲冰研凍朝將汲偎翠低紅夜深泣上前鴉襪倩人扶
落後弓鞬亂流立黃雲墮陣濁河頭紅旗扱鞞清淮流
駝囊瀉酒駝鞍喫鬼妾呻吟鬼馬愁蠻氈帳裏蠻絃語
春雁秋鴻亂無序崑崙不是姓康人琵琶忽作都亭女

北固山志

卷十

五十

鞍驟鞮馬三更櫛帶月乘星避呵叱偷壕出塹死誰是
虎口縋生命如蝨野田積水淮南道日乞窮途夜青草
娉婷秋月缺難圓爛漫春雲亂難掃雲煙羃屨天如弓
關山不見昔來鴻猿驚雁怯傷前侶鶴寡鸞孀泣故雄
北固山頭半城雪西陵渡口行人絕冤禽叫下土山雲
鬼鳥啼紅寺門血阿耶生我阿娘慈袖中卻扇妾郎詩
君生妾死君休恨妾死君生妾不知風風雨雨山頭壁
字字行行淚泚漉此時烈骨枕荒涼此夕遊魂客驚惕
豚魚吹浪江生風雲霓爲佩月爲容石颿山下颿來去

且上颿船到雁峯江南游子青衫客振筆題詩紀嗚咽
一弔江樓諡君貞再弔江樓諡君烈

新秋張君寄槎同蔡芷衫鮑野雲王柳村戴蓮石
鶴山石遠梅雅集松存閣予以病目歸舟翌日

依韻奉呈

吳中奇

鐵笛吹高秋濤聲逆舵樓心隨飛鳥疾氣挾大江流訪
竹循山墅班荆遞玉鉤仲宣眞足畏新詠滿芳洲
傑閣雲中起華筵樹底張古今餘俯仰天地入壺觴同
調宗風雅雄文接混茫顧予篷底臥獨夜意悲涼

北固山志

卷十

五十一

戲墨留鴻爪深情託酒瓢青山天外落明月故人招道
義千秋重襟懷萬里遙臨歧欣有約江岸候寒潮

柳村訂于

中秋前
至吳門

琴娘怨

吳樸

心在孤雲跡在泥幾番飄泊恨誰知可憐心是傷春鳥
不到江南不敢啼

甘露寺石壁歌

陳量

海門濤聲撞天立萬疊銀濤如馬疾濤聲欲括石帆山
虧得山根有石壁者壁不由工鑿成乃是五丁巨斧來

經營欹側偃仰無不有望之令人心膽驚二十八宿摩
其頂絕地凌雲回日景恍如插戟護仙垣石筍陸離鋪
作錦上有鑛鐵之浮屠下有習坎之龍居飛巖直上幾
千仞太古老藤連絡扶黃州壁雖赤燹煉皆損失夔州
壁雖青燒後亦凋零此壁完且久呵護依仙靈北軒今
已化爲塵狼石空留割據痕惟有石颿颿一片曾經見
過古時春

晚春同左佩登凌雲亭

張山

棟花風起浪花興千古危亭愛晚登落水殘霞光愈淡

北固山志

卷十

五十二

浮空新綠影俱澄閒同勝地偷難得情到中年感易增
如此長江流浩浩孤帆萬里破誰能

北固看紅葉

冬心無着處勝地覺來遲桃李消前夢江山妙此時葉
都如錦簇情頗爲霜移更倚紅樓上斜陽看最宜

何將軍園

剩有荒基在煙橫落木紛馬還嘶禿柳雕尙識寒雲樵
影夕陽入書聲午夜聞

地半入寶晉書院

我來臨大樹空憶故

將軍

重九前一日同張平伯李節夫北固後山觀釣復
至前山訪三賢亭遺址不得 二之一

誰說曹劉輩名山此數經唐人空有詠漢代已無亭塔
立鈴殘語崖懸雁度青漫懷千古意一笛起鷗汀

冬日同平伯北固後山閒眺

動地江聲疊浪稜際天鳥道拂雲層十年面壁吾何羨
萬里乘風爾自能不欲仰觀防石墜未宜深立恐沙崩
憑誰商略消寒事落日懷人指廣陵

北固山看紅葉

張南亭

北固山志

卷十

五十三

北固嶙峋一徑通千林如染望難窮江山有色憑茲豔
春夏無花及此紅閒步杖移蕭寺外微吟詩在夕陽中
風霜自是商量久畫出冬晴如此工

琴娘曲和王仲瞿

良士

石颿樓詩

陳裴之

月麟香暝銷銀燭畫屏照影人如玉三百龍腰卸錦囊
當筵試奏琴娘曲雙鎖風流署小名琴娘才調擅傾城
還憑怨鶴鳴鸞譜寫出單鳧寡鵠情珠柱微揮銀甲撥
此日琴娘死未匹赤城霞起豔明妝青石梁高亘香雪
宮聲徵聲換復挑此時琴娘春正嬌瓊花十隊圍紅玉

絳樹雙聲溢紫簫清商韻轉衡華裂此日琴娘恨啼血
鐵馬金戈捲地來嬌鳳雛鳳分飛急羅襪拋殘曉鏡春
東風吹墮落花魂零香斷粉無窮恨寫入冰絃有淚痕
處女餘生同脫兔晚潮東下橫江渡雁外金焦兩點青
家鄉何處天台路鶴唳猿啼激楚音墨花濡淚託悲吟
離鸞操與歸思引並入嬋娟此夜心雲容寂寞啼鵲哭
香魂飄泊隨黃鵠素壁流傳絕命詞西風雨蝕荒苔綠
腸斷江樓夕照時藟香蕭寺問誰知譜成三疊貞姬引
緬向千秋寡女絲

北固山志

卷十

五十四

寶晉書院瞻坡公遺像

孫 露

第一江山着此人飄然玉局想前身天回奏疏鬚眉古
地重東南俎豆新千載文章餘舊碣三州功業賸清塵
憐才尙記宣仁語筇屐風流仰蜀岷

雨晴友人招飲北固樓

張葆光

新洲舊嶼好聽鷗京口玉壺隨意提日瘦尙嫌雲氣溼
潮來漸覺海門低春風染水蒲桃熟夜雨催花錦繡齊
爲語主人傾伯雅莫教童子唱銅鞮

己亥仲冬北郊晚眺

潘思牧

一江屈曲帶三山寒水魚稀釣渚閑雁陣遠從斜日掛
塔尖高並暮霞攀衰年閱世塵心淡病叟扶筇足力慳
送過夕陽追素月頻浮大白醉方還

北固晚鐘

一抹晚霞浮綠柳滿天星月落江千鐘聲送客歸何處
放棹金焦興未闌

北固山下次王灣韻

東南薰

孤舟千里外旅泊暮山前壁峭風煙壯江空日月懸滄
桑誰信劫寺觀不知年縱目情何極蕭疎古木邊

北固山志

卷十

五十五

甘露寺

周起鳳

山寺鬱岌堯龍宮聳碧霄塔臨城北樹窗吸海東潮佛
宇珠璀璨僧房玉鏤雕殿高雲欲護樓靜水偏搖傑閣
藏蘭若禪關鎖沃焦水寬龍埂窄浪湧石帆遙清磬隨
波遠奇香帶雪燒梵音空色相劒石想風標王業成三
國雄圖振六朝嘉名依鐵甕 宸翰麗銀毫花木眞
堪挹丹青未易描江山稱第一登覽絕塵囂

甘露寺用王維香積寺韻

顏廷若

幽尋入古寺天際插危峰山枕江頭浪僧敲雲外鐘苔

深封很石溪轉識虬松入破一聲笛滄波起臥龍

雨中登木末樓

黃培

樹杪出樓臺江天四望開帆檣千艦落風雨萬山來洞
隱蛟龍蟄城高笳鼓催微茫渺高處終古使人哀

北固山懷古

尤斌士

海門日落氣蒼茫雄鎮東南據上方如此江山隨逝水
幾多爭戰剩斜陽孤舟帆影窗前落別嶺鐘聲檻外長
徙倚不須悲往事殘碑斷碣總荒唐

登石帆樓

劉省樞

北固山志

卷十

五十六

我來石帆樓悠然等輕舟如鼇赴川飲欲縮旋低頭山
光杪天淨江風何颼颼古樹亦何瘦孤帆不可留既爲
天下雄胡爲不中流我亦重義氣不在孫曹劉脚底生
雲煙伸手摘斗牛潮聲亦知止金焦掌上收天地亦何
窄不盡江山愁寂寂迴塵外年來輕王侯人生雄偉有
如此定知義氣橫千秋嗚呼人生雄偉有如此定知義
氣橫千秋

登北固樓望江

劉汝恆

踏破松陰到上頭此樓無恙我重遊秋山極目楓榆老

江水無情日夜流
夾岸煙迷京口樹
滿帆風送海門舟
登高舒嘯襟懷爽
底事無端發旅愁

登木末樓

袁新

振衣直上山之巔
萬頃一望何蒼然
長江西來日東驚
直赴海門不迴顧
南北誰分孫與曹
蕭梁事業如鴻毛
旌旗戰壘尋三國
歌管樓臺紀六朝
無端俯仰成今昔
春草青青沙鳥白
禪房鐘磬寂無音
惟見寒煙散空碧
題寶晉書院講堂壁間畫

九天雲垂海水立
精光閃爍聞噓吸
長毫倏忽回雄焱
北固山志

卷十

五十七

天矯神龍初發蟄
幾年蟠屈幽潭空
蜿蜒却與凡鱗同
沐日浴月養真性
一朝變化凌蒼穹
頗疑昨朝風雨激
尺木森張怒相敵
大珠奕奕芒角寒
滿堂震聾驚霹靂
浮漚磐薄滿銀屏
咫尺噴欬翻滄溟
爪騰不假扶持力
俯視齊州幾點青
爪鬣之而陡健舉
造化鍾靈妙吹煦
挽取甘泉入錦鱗
宇內方需作霖雨

北固山懷古

周開瑞

嵯峩北固枕南州
京江名區一覽收
山閣曉雲浮海色
寺鐘宵雨入江流
六朝勝跡煙中樹
三國雄圖水上鷗

硯山圖

楊錫祉

我欲訪元章元章不可見我欲訪研山研山已流轉祇
此寶晉齋披圖動人羨峰擁三十六玲瓏光采眩左右
引陂陀中平鑿爲硯龍池窈而曲時生白雲片昔爲南
唐珍後爲米老選易去筆成圖圖成石不面惟有海岳
庵不逐煙雲變

小雪後八日偕表兄倪耐庵秀才舍弟師陸遊甘
露寺
陳尙志

北固橫江寺蒼茫入望遙帆迷雲窟樹天接海門潮吳
北固山志
卷十
五十八

楚人情薄東南物產饒招携當十月頰汗未全消
石帆歌
眭福祚

巍巍北固眞雄壯片帆直插青雲上錯認長江十幅懸
那知峭石起孤嶂蒼茫山際風雨過重重入望煙痕拖
搖曳半空欲飛去欸乃山下聞艫歌四圍峻削聳雲壁
日與風檣互排擊多景樓前俯仰觀聲聲吹徹江天笛

新秋寶蓮庵聞蟬

顧鶴慶

涼意到人境碧落開塵襟出城一庵地恍入秋山深六
時無過客四面惟高林清風將暮蟬飄落空庭陰翛然

一聲杳萬樹舍餘音碧雲無定態江水迴孤岑高樓夕
陽亂香氣清蓮心

初冬偕茅松坪登北固山

應讓

意氣平生結客心滿山黃葉共登臨名場聲價輕徐庾
勝地煙霞閱古今前代空餘征戰跡壯懷聊付短長吟
此身未合江湖老一歲僧房幾度尋

漢荆王廟

討逆走兵符吳都及楚都運纜開赤帝鋒豈避鯨奴萬
姓懷宗室孤身殉版圖千秋祠墓在不使甕城蕪

北固山志

卷十

五十九

笠庵小憩

鮑文逵

西津頻問渡寥落北山扉尙有同心侶重尋舊釣磯石
危藤緊絡江冷雁高飛蕭瑟看如此吾儕可息機

同玉湖登笠庵別嶺樓

韓良

如今雅意屬滄洲柳上新鶯水上鷗誰說元龍高百尺
與君談笑最高樓

甘露寺月下寄

楊天祿

疎櫺潔白蕩花光遲月親人冷到牀癖牘圖書消歲月
嗜深泉石厭名場野嘶怒馬毛如雪樹繞驚鴉背有霜

清夢乍回江路永金焦兩點夜蒼蒼

雪後遊北固山僧贈紅梅爲案頭清供

楊良驥

雲凍江沈鳥不飛千峯朗朗玉龍圍忍寒更折江梅去
滿袖繁英踏月歸

松存閣坐月

雨霽天無雲坐對虛閣晚微風散松影涼月何清婉傾
觴就前除曠若凌高巘蛙聲滿池草露氣滋苔蘚一詠
歸來辭前賢意何遠

北固山志

卷十

六十

初夏同吳樸莊應地山張寄槎顧敬庵錢鶴山訪

石雷上人

如愚

北固山房同用韻

六代名藍照白波遠公日日費清歌樓臺縹緲開天上
鐘磬高低答澗阿繞郭晴嵐春雨潤隔江新綠晚煙多
休言蓮社風流盡尙有宗雷共薜蘿

冬至日楊時庵招集寶蓮精舍同得添字

南枝凍蕊半侵檐同叩禪關遠不嫌僧定何須量日線

風高欲覓却寒簾他鄉來歲愁難聚

明年余將北行李東崖擬游寧武

知己中年不易添宴坐莫辭重剪燭當頭幾度有銀蟾

聞張夕庵顧敬庵同住甘露寺作畫詩以寄之
仙家供養祇煙雲點染江山迴出羣揮灑一時吳道子
經營數月李將軍潮雞到枕詩初就竹露橫階酒半醺
聞道探微濡墨後尙留兩壁待諸君寺舊有陸探微畫
木末樓秋思
王 豫
憑闌人影落中流木末高吟萬里秋
六代蒼茫空皓月
雙峰環抱見危樓天連湘漢沉寒雨
霜老芙蓉入暮愁
江北江南無限思輕裝擬上米家舟

海嶽庵詠懷呈蔡生甫先生

北固山志

卷十

六十一

古人不可作誰嗣大雅音四顧感知己孤鶴鳴高岑
遠懷及研山飄零無由尋蘇米有遺像瞻拜夙所欽
松涵月色淡樓俯江光深萬古此江月如見古人心
古人亦
今人修士當自箴

秋日寶蓮庵同吳樸莊作

高閣閱寒翠懸崖入大荒江光浮樹杪山色淡斜陽
芳草不成夢蓮花何處香寤歌誠足樂况在水雲鄉

同蔡文芷衫吳瘦夫

中奇

石遠梅鮑野雲錢鶴山

顧敬庵夜集松存閣

共此秋宵月清光戀別羣客傾殘夜酒城抱萬松雲長
嘯鬼神入悲歌風雨聞結交今十載同調孰如君

俱是濠梁客開尊一見招新聲悲瓦缶大樂想雲韶詩

思秋江月離情古渡潮芙蓉樓尙在愁絕是龍標

石吳子

明日歸吳中

北固山寫懷寄侯葦園先生

學詩

松色帶江煙相看別幾年才名關閱歷元氣闢山川蘇
米空樓在雲霞眾壑連故園歸臥病長詠古苔篇

雪後憶青苔館

北固山志

卷十

六十二

青苔館張君寄槎讀書處也曩予與君暨吳樸
莊應地山鮑野雲顧敬庵錢鶴山輩七人結課
賦詩文酒過從無虛日君主予三閱寒暑其時
上元蔡文芷衫涇縣趙廣文偉堂吳江吳瘦夫
吳縣石遠梅武康徐雪廬句容笄繩齋同里戴
廉石輩咸來與會詞壇之盛自海門石帆後未
之或有也今皆星散不可合並且有人琴之感
撫景追昔能無慨然於懷耶

江上雪初霽返景溪流明旣眇幽草碧復罕春禽鳴緣

岸弄幽光入竹聞寒聲忽念坐高館相對持孤檠啟窗
灑玉屑展席飛瑤觥召友嵇阮至劈箋應劉賡往事杳
莫繼別緒紆已盈匪學蓬戶臥屢擬剡溪行聊以歌短
歌庶以攄積忱

同蔡生甫先生王子柳村鳳凰池步月

解 懷

鳳池仍皓月幾度客同看雲斂秋山淨鐘清鶴夢殘天
光依樹落人影入溪寒把袂情何極茫茫宇宙寬

走馬澗

北固山志

卷十

六十三

千秋豪傑半消沉古澗長存獨到今可恨蒼苔迷舊跡
馬蹄踏處不堪尋

三賢祠古柏

不見古人見雙柏雪霜千載老蒼顏古人久出塵埃外
雙柏長存天地間

石壁

峭壁疑從天外來波濤不洗舊時苔石流遠逐金鼇起
翠嶂遙臨鐵甕開山帶六朝青不斷江流千里浪初回
薜蘿空掛西風老誰向懸崖到處栽

凌雲亭東望

舉杯醉蒼煙波濤去浩然海水欲來天地浮暮雲落近
衣袖邊峯巒隱隱出煙霧山光水色相吞吐江流一綫
山外橫落日離愁江上樹

米襄陽祠

詹肇基

何年配食祀於菟顛米荒祠北固餘不見玉蟾蜍淚滴
壞牆苔蝕研山圖

北固

於震

江城木落成樓高鴉帶長煙下古濠鐵甕樓臺橫夜氣
北固山志

卷十

六十四

金山鐘鼓出寒濤鄭虔才調空三絕庾信關山感二毛
邱壑豈眞容我輩仰天長嘯獨揮毫

戊辰秋訪荆子天街京口旅舍遊甘露寺

蘆葦蕭蕭隔樹洲十年書劍客江頭懷人又過南徐路
弔古同登北固樓別後江山還是舊客中風景不宜秋
相逢到處慵回首祇有寒山不解愁

北固山謁衛公祠

周玉瓚

不共平泉草樹凋凌空雙檜影蕭蕭官移浙右旌初駐
筆灑江流氣未消自有功名維作鎮可堪朋黨競中朝

我如八百孤寒客欲向階前濁酒澆

海嶽庵懷米南宮用昌黎石鼓歌韻

學舍讀書寄京口抗懷先哲時長歌海嶽名樓有自仿
我思古昔云誰何米老築庵此山下周遭竹樹森矛戈
天開海嶽署四字勒石不使風霜磨憶昔研山妙殊絕
後主精緻勤搜羅上洞沾澤緣下洞三十六峯青嵯峨
癖石天使得奇石與君高隱歸巖阿繪圖作銘寓真賞
造化護惜神爲呵仲恭蘇氏忽見此流傳珍異溯不譌
研腹深暖環九寸恰似窪坎容蟲蝓有園一方接龍埂

北固山志

卷十

六十五

月黑聲聽鳴更鼉金焦兩點在指顧四圍圖畫皆繁柯
秋高鷹隼摩健翮春深鶯羽時穿梭地近甘露古佛寺
梵昔常颺訶羅陀以園易研徑持去奚必移負煩夷娥
改園爲庵詫劒獲淨名齋啟依江沱署名寶晉藏晉跡
內府款識標宣和秋月潭空漲秋水庵前過雨潛盈科
八十一穴俱瘦透羅列異品求惟多百夫輦至猶易易
重者道遠驅橐駝拜石餘閒拂麈尾仙髯佛印來相過
放筆作書並作畫畫禪書聖相切磋偶然墨戲得未有
煙雲過眼如流波先生交結洛蜀黨學識品誼無偏頗

黨碑矗立名不列置身仙佛心靡他一船書畫臨江上
豈隨世俗爲媿嬰研山携去不復返一圖高掛勤摩挲
清雄絕俗大文字蜀素詩卷共吟哦尺縑寸紙如拱璧
山陰可笑籠中鷺祇今庵址仆學舍流風已杳問則那
御屏書後卽歸隱自甘蕭散非轆軻緬想凌雲興奇氣
欲引古道回江河海嶽名言富著作豈類邱壑徒蹉跎

研山圖

清 瑞

銀青大夫研山石海嶽庵前曾易宅宅中寶晉多松杉
灩灩甘露垂梢滴上皇山樵致一品八十一穴雲弄影

北固山志

卷十

六十六

百夫舁置空庵中拜石成顛呼不醒襄陽自古稱雄州
黃鶴樓前漢水流爭似三山浮木末長江直接海門秋
米老昔知無爲軍愛此奇勝願卜鄰但恨二王無我法
筆底蟠屈飛煙雲貴聯戚黨棄不顧一官落拓風塵路
好潔成癖性所耽自結茅庵依北固胸中早已浩如海
五嶽圭稜方寸在天生奇地住奇人風流裙屐何瀟灑
教子元暉繼阿章虎兒肯構公肯堂舊址猶存石碣蘚
其人已往平疇荒安得呼公復下拜嵌空玲瓏石光怪
袖中東海來髯翁一笑昂頭向天外

雨中登凌雲亭

江天空闊處雲物望中收
潮挾山奔岸風兼雨入樓
六朝煙樹渺一水古今流
回首滄波晚汀洲起白鷗

甘露寺鐵浮圖歌

巍乎高哉卓立千尺摩蒼穹
不與尋常浮圖同聚幾妙
鐵經爐冶鑄千佛像昭尊崇
考古究與何代始有唐肇
基李衛公謂與金剛同不朽
難逃浩劫遭祝融幸有裴
璩重修整莊嚴樓閣營花宮
我聞建塔藏佛典或迎舍利
居其中眾塔木石皆易朽
獨此鐵鑄堅難攻插地穿

北固山志

卷十

六十七

雲十一級崢嶸八角飛玲瓏
想因魑魅肆荼毒仗倚佛
力驅羣兇神靈呵護蛟醜避
力敵造化天無功鷺嶺宏
開縱披豁更見六塔來朝宗
揚州三塔若拱揖或隱或
現煙濛濛城南一塔如卓筆
金山一塔如騫鴻焦山之
下一塔聳海天表識圖山東
蕭公鐵鑊何足數孫郎鐵
甕差爭雄慈恩題塔詩具在
光燄萬丈聲摩空我登凌
雲詩賦此唐賢應許吾追踪
此塔已歷千餘載風雨剝
蝕苔花封會當鐵柱峯頭立
俯視金焦兩點青芙蓉

羅郡守重修荆王廟

何振銑

興步踏遍新城路面面江山列雲霧每從北郭相經過
黯然神廟僧防護榱桷傾欹基址荒夜月淒涼伴古墓
古墓歷今千百年荆王遺像猶赫然想見在昔騁馬拂
長劔賈勇出入烽煙前漢家多難兵接連千軍萬軍身
當先夙昔久懷忠烈志列陣何惜危軀捐精魂縹緲依
京口子孫繩繩爲墓守反逆不從身見幽丹陽縣荆氏
言卽荆王後
不從反逆事據荆氏家
譜言之正史不載原注繼述信能承厥後安侑先靈奠
玉觴廟與河山共悠久歷代遷流事旣遙古樹蒼翠風
蕭蕭後裔散移四方去祭享於今亦非故我公賢明守

北固山志

卷十

六十八

是邦大興學校文運昌眼見遺廟不忍廢修建用爲神
靈光足勸人臣死王事綿遠百世能流芳意見孰如我
公良吁嗟意見孰如我公良

北固山房看紅葉有懷野雲

張 鉉

風緊雁聲寒霜濃柏葉丹江南秋色老天末客衣單壯
士悲殘照流光感激湍遙知官閣底鄉思亦無端

甘露寺觀試劔石

房煥台

一劔山河裂天驚石自開至今騰虎氣不見臥龍才海
嶠帆檣擁崖阿鼓角哀荒涼悲棟宇浩劫已飛灰

石颿樓尋秋

蔣宣書

小試謝公屐幽居谷口通妙香初地外秋氣一樓中竹
映鬚眉碧花連棟宇紅坐來清興永帆影落湖東

丁巳仲春同友人登北固山樓

林玉

天遠海如立山孤勢覺高樓頭通蜃氣巖脚走波濤鶯
語千林滑螺杯滿席豪不須愁日暮新月照江臯

北固山懷古

張星聚

振衣北固望偏遙回首當年志氣銷顏謝詩存人寂寂
孫劉跡滅恨迢迢大江波浪通三楚明月樓臺自六朝

北固山志

卷十

六十九

幾度臨風問消息淡煙疎雨滿山樵

宿笠庵

楊試昕

山居秋夜長橫琴復垂釣遙見一僧歸江月微相照

北固山秋望

吳曰鼎

第一江山古潤州黃花開過客登樓海門風月長天迥
瓜步人煙夕照收水落潮聲猶近郭時平軍令亦防秋
寄奴事業空塵土荒草寒雲竟日愁

滿地西風氣莽蒼樽前懷古思茫茫無邊白浪橫京口
不斷青山擁建康野鳥亂飛天欲雨悲笳爭起鬢先霜

誰知一片繁華地盡是當時戰鬪場
每將峯勢作雲看征雁高飛欲度難地闢金焦雙島闊
天連吳楚一江寒塔無風過鈴聲小山有人行木葉乾
笑問謝公吟眺後誰曾拈筆再登壇
海上樓船憶往年江南久已罷戈鋌霜堆楓葉霞千嶺
水浸蘆花雪一天瘦馬蕭條當道立哀鴻離散任風旋
讀書憂國男兒事爭奈浮楂未有緣

甘露寺陸探微畫師子歌

張崇蘭

青猊盤珊好毛骨破版曾邀陸生筆空堂斗覺生風沙

北固山志

卷十

七十

欄檻欹危愁欲出吾聞此物多威神產自康古與大秦
百年中國不一見畫圖往往疑失真怒則威在齒喜則
威在尾修髯茸毳颯然起擾擾毛羣怖欲死何年西域
貢玉墀睹者如堵駭且疑陸生旁睨偶得之却思神物
不數覲迅筆一掃留奇姿毫端全具搏象力不爾此態
誰能爲千秋粉墨易剝蝕跡則已失名猶垂我今未覩
陸生畫頗憶蘇公昔歡詫蘇公一贊能寫生筆力不在
陸公下

新霽北固山樓同趙星甫朱月樵作

江南四面擁樓臺煙景蒼茫夕照開游屐每逢新霽出
故人恰共好春來登臨興廢懷今古賦詠篇章屬上才
點筆石欄頻絕倒晚風吹鬢坐莓苔

天津泉

盧肇

北固巖端寺佳名自上台地從京口斷山到海門迴樹
色煙中減潮聲日下來一隅通雉堞千仞聳樓臺林暗
疑降虎江空想渡杯福庭增氣象仙磬落昭回覺路非
花染流年豈漫催隋宮凋綠草晉室散黃埃西蜀波湍
盡東溟日月開如登最高處應得見蓬萊

北固山志

卷十

七十一

乙卯初秋凌雲亭看日落歌

蔡元春

北固山勢聳崔巍朋儕招遊屢追陪爲愛清光望秋日
凌雲亭上何雄哉初時夕陽未西匿紅霞掩映百道開
迴光恍見珠貝闕返照更射金銀臺吾聞太真然犀曾
照海幻相百怪爭喧豗又聞東坡偕僧看日落微風萬
頃共嘲詼何如茲亭凌倒景陽開陰闔萬象該須臾日
漸入濛汜上頭昏黑暮色催馮夷出宮欲俯闕義叔昧
谷難仰猜魚龍原將秋作夜鼉鼉暗鼓浪成堆揚子渡
迷綠霧密石公山近苦湮埋我思此江奔流東注海佳

事觸緒填胸懷劉裕防江跡已遠徐市求仙去不回十
萬府兵骨已朽五百童男心尙孩烈士暮年當春景百
端交集使心哀安得魯陽揮戈迴日馭金鴉騰翥明蓬
萊

長至日偕胡韻清陳象吉遊多景樓

張學仲

地底一陽動天涯萬木春樓蒸江海氣山閱古今人蕭
寺賓朋聚髻齡意趣眞浮光眞過隙轉瞬歲華新

寶晉書院古檜歌

北固山志

卷十

七十二

齋前老檜勁且直枝榦槎枒勢欹側翠葉濃分翰墨香
霜皮厚染詩書色不與桃李爭春華闇淡亦如人悃悞
烏啄蟲穿春復秋柏葉松身人不識一朝眞賞荷名公
始信奇材殊杻檟根株定從闕里分輪囷合向書堂植
吁嗟名材困荆棘一例薪樗誰拂拭願如老檜荷垂青
生成也借栽培力

謁陸忠烈公祠

戎馬倉皇大海東崖山風雨泣孤忠五庚運已終全宋
四子書猶勗幼沖社稷有靈應復國江山無地更移宮

獨瞻遺像荒祠裏松柏蕭蕭夕照中

伯義按作詩時公祠猶未遷正峯之麓從
本稿錄入別作五庚四子作偏安大學

哭徐竹初先生 四之一

劉懷祖

邑志按先生名玉立甘泉人由進士入中書乞
養家居晚慕江山之勝道光十八年來主寶晉
書院講席越二年庚子夏風雨大作邑之諸山
各有崩裂是日先生臨海岳樓下樓後石崩木
拔樓傾先生竟以壓死

官辭薇省舊逃名暮齒來尋海嶽盟六代衣冠原是夢

北固山志

卷十

七十三

一樓風雨太無情文章竟被山靈妬人士猶傳月旦評
米老風流長已矣荒齋誰繼讀書聲

甘露寺石壁歌

陳宗聯

大地之大此一卷北固之北此插天壁立江渚高且堅
障蔽鐵甕藏金船甘露佛寺誰安禪鐘鼓響徹江雲邊
紆迴突兀厓如懸秋月潭映峰之顛矗立忽聳鉤弋拳
敵坐誰削洛水肩離奇變幻橫相連虎伏更有虬龍眠
斑斕五色醜亦妍采繪都成霞與煙捫蘿拾級鳥道穿
羊腸九曲盤且旋褰裳欲上心駭然登高况復臨深淵

下拜漫學南宮顛達摩久立空塵緣吁嗟呼孫吳棟宇
猶袞延戰爭毋謂媿當年萬古飛躍唯魚鳶

很石

王商霖

楚甸吳江入莽蒼霸功猶自說孫郎三分割據隨流水
一片嶙峋臥夕陽北府軍兵空逐鹿西陵門戶早亡羊
太平幾度苔班坐不見當時舊戰場

梁武帝鐵鑊

百斛陂陀尙未乾雷文帶雨繡衣寒金甌已見山河闕
鐵面能無社稷殘一錯竟成呼落落千秋空復對團團

北固山志

卷十

七十四

東坡詩相
對空團團

物金神滅眞孤陋休笑諸臣守井榦

題甘露寺壁

朱上駟

樓閣孤撐杳靄間風雲應爲護禪關江環南極幾千里
寺占東吳第一山蹟訪孫劉談割據詩尋蘇米話蕭閑
我來不淺登臨興載酒觀濤未擬還

北固山凌雲亭

殷荃

石磴摩空出寥天滿夕陽江流無日夜人事幾蒼茫逕
轉一峯上天低四座旁漁歌聽隔浦聲在水雲鄉

甘露寺很石歌

朱士龍

大江之中北固陬橫亘此石何代留江山浩劫曾千秋
爾當臥如獌兮攫如虬紫髯碧眼孫仲謀羽扇綸巾忠
武侯相逢據石何夷猶是時老瞞下荊州雄吞眼已無
孫劉兩公對坐此運籌英氣噴薄大江頭天驚石破神
鬼愁東南風蹴水倒流朦朧千里一炬投爾雖不言能
記不吁嗟呼三分事業久已休惟見兩岸蕭蕭蘆荻洲
石兮石兮我欲鍊爾補天遠應媧皇求又欲鞭爾下海
聊當騎鯨游不然呼起子瞻米顛重唱酬研山雪浪爲
汝儔載汝金焦酒船相拍浮下視塵世如浮漚

北固山志

卷十

七十五

石帆樓遠眺

蔣名甲

落日青山獨倚樓雄圖空復說孫劉萬家煙景圍千堞
一抹雲陰護五州暮色蒼茫人憶遠江聲澎湃雁鳴秋
老夫不解前朝恨安穩蒼波着釣舟

羅將軍歌

周承彥

揚子江頭陣雲黑海氛動地來倉猝將軍奮勇不顧身
執銳披堅親矢石我聞將軍善用兵整齊步伐常嚴明
陣前氣奪吳元濟塞上勳高薛廣平忽然矢盡驚援絕
眼底貔貅散行列叱咤猶聞殺賊聲征袍竟染萋宏血

男兒報國死沙場戰士何人不激昂太息百身嗟莫贖
獨留千載姓名香土人藁葬濱河澣七尺昂藏埋淺土
當時父老述遺聞猶說將軍力如虎 聖主南巡特

沛恩親頒 天語卹忠魂洲前立廟臨江水血食端

應萬古存南徐水勢頻遷徙潮汐侵凌洲竟圯浪捲沙
吞勝蹟湮沉埋遺像洪波裏竭來卜築傍河干移祀常
教毅魄安門前對峙睢陽廟忠義還應一例看去年狂
寇摧京口鐵甕雄區嗟不守烈燄連天若燎原荒祠竟

一作屬無何有吁嗟呼將軍靈爽自在天棟宇興廢一作

北固山志 卷十 七十六

興廢亦偶然顯微闡幽吾所望作歌顧告守土賢

登北固 王傑

片壁拔江底東南保障雄昔年屯虎帳當代作龍宮今
古壞思裏山川俯仰中登臨一長嘯黃葉下西風

梁武帝鐵鑊歌 趙元益

空山叱咤走雷雨危樓撼動鳴鐘鼓是何寶物佛所呵
晝晦不許蛟龍取異哉古鑊徑幾尺曾否水火借烹役
鐵鑄蕭梁武帝時日久年深氣猶碧上鑄天監五年製
字體蒼勁勢傍魄螺紋蝸篆態陸離微瀾中深雨餘積

我觀此鑊摩挲徧可憐閱盡滄桑變大寶曾傳幾十年
故鐵惟留此一片當時同泰起大工金碧交輝觀者眩
捨身施佛兩三番宗廟不用牲牢薦一朝侯景逼臺城
玉馬銅駝都不見舊物難留故主家遺珍究獻何王殿
不隨兵火劫成灰鼎鑊猶存此僧院世間寶貴不多得
贊皇李公手植柏畫師伏獬同見珍東坡題詠稱佳客
更兼鐵鑊列其中甘露千秋聚遺蹟諦視恍惚煙雲繞
內容香飯知多少佛緣竟不護山河吁嗟鑊兮令人惱

壬寅六月七日英人由海入江破圖山關逆流而

北固山志

卷十

七十七

上至甘露港又七日郡城陷

海風倒驅江作山夷船蟻聚盤上關黑煙騰空疾如馬
轟擊萬鬼去復還關口員弁那能守八十餘人同日走
夷搖船過鬼長嘯火箭在腰弓在手郡城西指揚帆來
火輪碾起江中雷焦山象山礮不發問設此備何爲哉
是時城閉已十日不放一民私出入縣官愁殺城內飢
載米叫城開不得青州兵勁將敵摧黑夷被喪稍退回
八旗有守而無戰眾寡不敵齊心灰夷鬼登梯斬關進
官兵紛紛各逃命將軍下令誅漢奸不殺外夷殺百姓

滿城號哭聲震天火焚西門屋萬千死焚死殺等死耳
民命雖多不值錢老夫避寇山南處日對妻孥默無語
知他夷逆幾時平回首江城淚如雨

七月十五夜北固山樓題壁

余亦飄零客來登北固樓大江餘舊恨明月又新秋知
已經年別音書何處投欲將今夕酒一洗望鄉愁

笠庵次汪劒池韻

李肇祥

面壁庵如笠危樓壓大江怒濤翻積石飛雨入雕窗抵
足分禪榻觀魚指釣缸汪倫幽興劇詩思未能降

北固山志

卷十

七十八

海嶽樓懷米南宮

陳壽彭

愛潔胸襟占格高放顛任意亦情豪生平知己惟奇石
消遣閒身是濁醪齋額於今顏寶晉研山自昔助揮毫
一船書畫煙雲裏曾泛春波綠滿篙

甘露寺弔李太尉

太尉祠堂策杖行石帆樓外柏森森金棺瘞雨空苔蘚
鐵塔撐雲自古今死後孤寒猶下淚生前朋黨亦何心
訟冤有疏終無補千里長江咽恨深

登望海樓放歌

我聞滄溟一瀉幾萬里時有鯨角跋浪起龍堂鮫室潮
頭高大壑風迴作瀾紫昔人賦海才誰工前有木華後
張融奇情異態供縷述到底形容不能悉我欲御風行
碧空飛入海山金銀宮惜未腋邊傅兩翼安得大觀豁
胸臆巍然一樓高矗天雲梯百尺相鉤連閒來乘興恣
登眺羣山萬壑羅眼前甘露金鼇列屏障縹緲雲煙落
紙上海門屹立雖甚遙海天一碧已相向想到三年波
不揚遐陬白雉來越裳蒲牢不吼櫂歌發鬢帆高掛隨
浮航又想伯牙援琴造山林杳冥禽鳥噪天空地闊移

北固山志

卷十

七十九

人情撥絃譜作水仙操無怪祖龍心好奇橋鞭石走鼉
梁支仰觀霞出夜將曙一輪日捧扶桑枝無怪武皇悅
五利金丹可成藥可致安期羨門仙之人訪求欲徧蓬
萊地忽然雲幻青芙蓉幾枝飄落圖山峯想見長波一
葉泛乘蓮太乙時相逢忽然晴虹截殘雨五光十色映
丹宇金碧樓臺俄頃成知是珠胎蜃氣吐何日鵬飛騰
九霄背若泰山搏扶搖鶯鳩斥鷃不敢笑北溟一徙南
溟遙卽今可有浮槎至舂糧不少探奇志碧天如洗明
月秋欲泝銀潢貫斗牛望中豪致不可遏填胸逸氣吞

十洲信乎觀海難爲水蛙語蠡測何足擬更上一層遠
目窮心隨江漢流向東凭欄殊有破浪意願同宗慤乘
長風

過鎮江城

李聯琇

川原氣已洩長坑鐵甕雖堅不稱名眺野正愁登很石

包山翻更築羅城

賊依北固山築城周遭
綿亘望之如虹垂天半

可憐破產千

家盡贏得崇垣一道成永與

皇圖增鞏固江防何

啻萬屯兵

李衛公祠

趙克宜

北固山志

卷十

八十

古潤江山此壯觀衛公遺烈舊碑刊招降西域僉壬忌
駐節南徐父老歡塔影不隨飛浪去檣聲猶入斷雲還
銅符安得如公握鐵甕堅城萬載完

讀甘露寺碑記

談安愷

山寺殘碑臥曲廊我來拂拭認前唐歷觀古寺苔紋瘦
行到高峰松影涼六代風流隨逝水千秋陳跡賸斜陽
只餘寶晉書聲滿尙間疎鐘徹上方

北固山

戴楫

北固聳雙峰雙峰相盤互後峰之勝處石壁峰陰踞嶙

岫自今古下壓江濤怒昔此來悵悵潮上不能渡邇值
江水落豁達山足露峭壁數十丈突兀而容與招我重
來遊歷覽屢回顧石壁我石友久別今一晤

偕同人遊北固

今日天氣和登山愜情愫携手二三子行行來北固僧
廬闢新宇遙瞻橫野趣縈迴度山埂逼仄聊緩步游目
忽然曠江天識神遇乘興陟淩雲縹縹仙風馭歎息亭
園頽遺址還可據雲際歸雁來飛飛渡江去

秋日過石帆樓

張正路

北固山志

卷十

八十一

獨曳枯筇謁梵宮今朝清興若爲同煙迷城闕千家晚
簾捲樓臺一笛風江上寒蘆鋪雪淨林端霜葉壓花紅
東籬殘菊紛披甚伴我幽懷夕照中

漢荆王廟在府署東乙酉楚南羅麓西琦郡守葺
而新之紀事

紺宇雕甍煥幾重巍巍廟近日華峯檐牙錯列魚鱗瓦
殿角低連馬鬣封墓在廟中遺像載瞻思逐鹿奇勳歷數記
從龍信堪食報經千載史冊焜煌盡銘庸

夜半驚聞垓下歌天潢一脉建功多燒糧楚境宵然炬

拓地淮南夜枕戈應與蕭曹登虎帳合偕絳灌侍鑾坡
若書偉績昭今古十丈懸崖定可磨

酬庸錫爵王雄城同姓分藩拱漢京竟以土茅頒上將
非徒礪帶永宗盟風搖旌旆來黔布月冷弓刀走敗兵

空有侯門舊孫子曲阿流落氏傳荆

王子孫多在丹陽因避禍改姓荆

太守清廉五馬來剪除荆棘掃莓苔鳩工畚築成華屋
鶴俸輸將聚美材黛映一庭松色古香留三徑菊花開

公於廟中種花蒔菊

遺忠景仰施丹堊吏澤賢聲遍草萊

同蔣五峯

名甲

叔父北固山樓待月

北固山志

卷十

八十二

僧閣遲涼月西風生素襟人煙山郭起暮靄戍松沉浦
樹含秋意江雲散夕陰蕭蕭蘆荻外漁唱答高吟

亂後同秦郵張評菊石帆樓感望

張坦

干戈擾擾極天涯兩字功名感歲華淮海南來同作客
大江東去已無家藏身敢羨山中屋却賊思吹月裏笳
共有請纓豪氣在少年底事老魚鰕

張于湖紅羅賞妓處

陸萬言

大雅聲華名宦心樓頭題額一登臨風流要數京江守
笑却尊前潤筆金

紅粉多情翰墨緣
美人才子總神仙
只今韻事從何繼
多景樓頭空暮煙

謝幼度釣臺

峩峩石帆峯
下有釣臺址
清風時去來
高山日仰止
臨流懷謝公
垂綸昔在此
曾與阿兄書
終日羨魚耳
江流笠影邊
人住山色裏
鷗心了無驚
鶴詔徵不起
風味四腮佳
煙景一磯美
今昔俯仰間
人代逝如水
對酒思鱸魚
沼流薦蘭芷
空江不見人
釣石尙齒齒
扣舷歌未終
回頭月上矣

北固山志

卷十

八十三

試劒石

王煦

寒煙生北固
斷石落岩隈
昔日談兵處
何人說劒來
青山自今古
夕照倚樓臺
莫問英雄事
城頭畫角哀

九月十八日同李楚生丈趙子舟鄒狷庵邀許珊

林榘

太守張介石

元揆

明府集北固山多景樓

龍埂龍嵒亘
北南高樓縱
目恣幽探
迴環似到煙霞嶺
蔥鬱深藏海
嶽庵塔影圖
峰排闥入風聲
瓜步趁潮酣
白門秋柳青
無恙計日將停
太守驂珊林將有金陵之行

張于湖紅羅賞妓

陳瑞芝

三字題成多景樓張公遺韻獨風流初傳白紵千秋豔
賞藉紅羅百匹酬一自豪翰勞運腕卻教粉黛盡纏頭
只今京口傳佳話勝似籠鵝只自謀

潤州懷古

楊保貞

寒波門外好勾留往事懷孫更憶劉試劔枉教驚石破
降帆依舊逆江流澗傳走馬寒林暮埂繞迴龍碧草秋
三國河山誰捐點有人憑弔倚層樓

北固山

瓦礫場中蔓草支山禽猶喚舊時枝牧童齊上迴龍埂

北固山志

卷十

八十四

牛背斜陽一笛吹

鎮城凱歌

四之一

林福源

雨洗孱顏不斷青樓船燈火望前汀論功若準元和格
第一江山好勒銘

登北固山樓

竇鎮山

欲挽狂瀾既倒流登高遙望海東頭更誰作府儲軍實
第一江山第一樓

北固樓

許長齡

大江流不去終古此高樓浪湧金鼇闊風號鐵甕秋野

雲飛蒜嶺遠樹認瓜州鐘磬聲搖落重欄接斗牛
春日多景樓望江

十里桃花水晴波兩岸平揚州春夢縷京口夜潮生漁
艇荒城暮征檣萬里程夕陽風一笛遠樹亂鶯聲

很石

釋大錯

怪石橫欹古寺東薜蘿蕭瑟對秋風廣陵濤壯雄圖盡
鐵甕城高霸業空雨溼殘碑苔影綠霜沉斷劔土花紅
山樵不管遊人恨一派歌聲亂水中

甘露寺訪希聖上人

復顯

北固山志

卷十

八十五

北固有禪林庭餘古柏陰上方傳夕磬下界聽圓音名
畫已無蹟劒痕無復尋愛茶逢趙老小啜見初心

泊北固山下

實乘

孤客秋江外江聲攪客愁水搖星月動山戴殿庭浮世
事歸空色天涯任去留侵晨霜露下風葉滿汀洲

宿甘露丈室

澄洮

多景樓堪倚窗開萬象新雙峯雲外寺孤月定中身南
北江無限東西塔有隣我來尋舜老剪燭話頻頻

登北固山用唐孫魴韻

達瑛

北固山如畫僧形似鶴形江橫三面白樹帶六朝青塔
影餘殘照漁歌集晚汀我來秋正好落葉滿空庭

登北固山

達真

鐵甕城邊雨乍收蒼蒼山色入清秋荒臺客去雲隨屐
古寺僧歸雪滿頭天塹中分雄北府夕陽西下付東流
何時釀酒雙麟塚放眼重登木末樓

鳳凰池

如愚

清池但使靈源在猶待丹山彩鳳來小構茅亭池上住
山窗日向鏡中開

北固山志

卷十

八十六

凌雲亭

一面清江三面山蒼煙萬頃白雲環閒憑六曲朱闌立
數盡歸鴻人未還

秋月潭

澄潭萬古清如鏡相映中天月倍明紅蓼白蘋秋瑟瑟
夜闌無事獨經行

北固樓坐月

夢蓮

海月今宵滿江山此地幽誰分銀漢水來浸白雲樓花
影迎春醉茶香入夜浮行人猶未止煙外櫓聲柔

雷音堂題壁

海筏

雷音堂外日初斜
幾點青山映碧紗
莫道僧家無色相
秋來一路海棠花

過甘露寺

普融

庵尋海嶽步遲遲
滿徑花飛雨過時
一院綠雲新茁笋
數行殘墨舊題詩
巢松野鶴僧同瘦
照眼明燈佛本慈
半榻茶煙留坐久
門前樹影看頻移

甘露寺

女尼舒霞

鐵塔凌波起南山
隔岸浮空香花乍
雨林迥竹先秋室

北固山志

卷十

八十七

似蛟爲室樓疑蜃
結樓秘藏多梵筴
龍樹此曾遊

北固書壁詩

自序

閩秀衛琴孃

妾赤城弱質也
姓衛小字琴孃
于歸三月忽遘
難端匝地鼓鼙
擁之北上悲門
外卽是天涯慟
生離更難死別
歷吳渡淮欲死
無所幸而琵琶
擊碎得脫虎口
潛逃破面毀形
蒙垢廢跡晝乞
窮途夜伏青草
吞聲背泣生恐
人知托流水之
飄花以來京口
偶登北固江山
滿目不覺涕泣
如狂憶昔爹媽
空勞魂夢良人
天遠存歿何知

一時顧影自憐則花容盡毀於風塵衣衫全屬
於泥塗矣此夕此心如焚如刺回首雁峯何年
得到惟思遊魂帶血夜化啼鵲又恐不解南歸
家鄉信遠因爲短吟數絕泣書壁間倘得仁慈
德士傳其言於妾家亦足以達孤親云爾
夢裏還家拜阿孃相逢泣訴淚千行窗前綠樹依然在
那得看來不斷腸
衣片鞦韆半委泥千辛萬苦有誰知幾回僻處低頭看
獨自傷心獨自啼

北固山志

卷十

八十八

目斷天台旅雁長青山綠水杳茫茫不知憔悴中途死
魂夢何時返故鄉

登木末樓晚眺

陳逸仙

柳青橋畔柳煙輕人士嬉春照水行幾樹斜陽搖絕壁
半天歸鳥落孤城南山勢接江濤闊北固雄臨海氣平
六代消沉俱是夢白雲深鎖古今情

石帆樓懷古

鮑之蘭

很石千年賸舊名孫劉霸業歎空成平原牧馬秋圍獵
古木驚風夜渡兵天際檣烏沙嶼迴雲中雉堞莫煙輕

微生幸有攄懷處暢詠高樓坐晚晴

登凌雲亭

孤亭登翼海天中小立身如燕受風天塹雲連秋水闊
石帆峯遠夕陽紅鐘聲塔影招提在鐵騎金戈霸業空
登眺無端歌慷慨古來巾幗總英雄

重九後三日同左畹鄉夫人北郊看菊薄莫泛舟

江上

絡綺蘭

落葉蕭蕭一徑通幾家黃菊夕陽中瘦如我骨花應惜
清到君才月許同出樹鐘聲來北固穿雲雁影下西風

北固山志

卷十

八十九

海門燈火揚州近更擬紅橋放釣筒

登木末樓

載酒獨登樓憑欄四望收江光初過雨山意自成秋霸
業隨流水孤城起暮愁微茫煙樹外帆影落瓜州